



C40-4514

C40  
4514  
45

品四九

卷六

正法華經疏

經卷第六  
西晉三藏竺法護譯

藥王如來品第十

佛告諸比丘道法一等無有二乘謂無上正真道往古來今無有兩正猶如衆流四瀆歸海合爲一味如日所照塵不周徧未曾增減若族姓子欲至正覺解無三塗去來今者當學受持正法華經分別空慧無大度想不以華香妓樂供養爲供養也當了三脫至三達智無極之慧乃爲供養所以者何乃昔久遠劫往稱限爾時有佛號玄

至真等正覺明行成

B 64853

爲善逝世間解無上士道法御天人師爲佛衆祐世  
界名大淨劫曰淨除藥王如來壽二十中劫諸聲聞  
衆三十六億菩薩大士有十二億時轉輪王名曰寶  
蓋典主四域王有千子端正勇猛有七寶聖臣降伏  
怨敵其王供養藥王如來具足五中劫與眷屬俱一  
切施安奉敬藥王過五劫已告其千子吾已供侍如  
來若等亦當順遵前緒於時千子聞父王教復以五  
劫供養藥王如來進以上妙不違所安彼一太子名  
曰善蓋閒居獨處靜然思念我等今者供養如來寧  
有殊特超彼者乎承佛威神虛空有天而語之曰今

族姓子豈欲知耶有法供養最尊無極又問曰何謂  
法之供養天曰爾當往問藥王如來普當爲若分別  
說之善蓋卽起詣藥王如來所稽首于地白藥王如  
來曰法之供養奉順典者爲何謂乎世尊告曰法之  
供養者順若如來所說經典深妙優奧開化一切世  
間人民難受難見出家捨利志求菩薩諸篋之藏曠  
邈處中以總持印而印之精進力行不退轉輪現於  
六度無極之慧殷勤攬攝佛之道品不起法忍關入  
正典於諸羣生設大慈哀降伏魔兵離諸法見覺了  
演暢十二因緣無我無天詳壽非命志空無願無想

之法不由衆行處于道場而轉法輪勸諸天龍捷脊  
和等莫不樂仰開闡法藏護諸賢聖宣揚顯布諸苦  
薩行究竟衆苦無我非身羣生違禁立以所便衆魔  
異道墮顛倒見貪倚有爲常懷怖懼而爲咨嗟諸佛  
之德使滅生死慰除所患而見安隱無爲之事去來  
今佛所歎如是而剖判了微妙色像總持崖底諸法  
法忍開導宣布闡發諸器權便所義將養正法是爲  
法之供養設於諸經志在法忍敷陳典籍而順反覆  
演訓其要無諸邪見無所從生不起法忍無我無人  
入諸因緣無瞋不諍無所訟訴無我無壽循執句義  
而無識著慧無放逸將御心識住無所住識理指趣  
因導非義淘汰通流諸所倚法不造見人恃怙真諦  
如法所歸無著無入斷諸倚著滅諸無黠生老病死  
悉爲除屏觀十二緣而不可盡覩諸住見不墮顛倒  
是爲族姓子法之供養王子善蓋從藥王佛聞法供  
養應時逮得柔順法忍卽脫身衣以覆佛上白世尊  
曰唯加聖恩建立我志如來滅後願護正法興法供  
養降魔怨敵將迎後法時佛知心然其末世當護法  
城佛告比丘王子善蓋因佛現在以家之信出家爲  
道常精進學興諸德本不久成就立五神通總持辯

才無能斷截佛滅度後神通總持力無所畏卽皆具足於十中劫藥王如來所說經法爲轉法輪善蓋比丘護正法故於一世中化千億人悉發無上正真道意而不退轉十四載人立聲聞緣覺地不可計人得生天上比丘欲知時王寶蓋豈將異乎今現在佛寶焰如來至真等正覺是也其王千子此賢劫中千佛興者是拘樓秦如來爲始最後成者名曰欣樂太子善蓋今我身是是故當知一切所供無過法供養去來今佛皆從是出若族姓子族姓女欲得供養十方諸佛卽當受持正法華經諷誦讀宣示一切分別一乘無有一乘道時佛頌曰

假使有一欲解大法開化一切  
皆至正覺當乎受持斯法華經  
宣示遠近諸未聞者譬如泉流  
皆歸于海合爲一味無有若干  
聲聞緣覺及菩薩道一切皆歸  
無上正真譬如日月照於天下  
百穀藥木及諸荆棘斯典如是以無極慧照耀三界皆入一義  
曩昔如來名曰藥王時有聖王

名曰寶蓋 五劫供養 彼藥王佛  
一切施安 無所乏少 告諸千子  
使供養佛 千子受教 踊躍等心  
供養如來 亦俱五劫 飲食牀臥  
旛蓋妓樂 善蓋太子 間居自惟  
寧有供養 諰於此乎 空中天言  
法供養勝 卽自問言 何謂法供  
天便告曰 當行問佛 太子卽問  
佛爲具說 難解之句 深妙法藏  
空無想願 乃入正慧 大慈大悲  
降伏衆魔 六十二見 自然爲除  
無常苦空 非身之事 無我無人  
無壽無命 順至將持 不起法忍  
轉不退輪 法法相照 十二因緣  
展轉相生 已解本無 無有終始  
於是善蓋 得柔順忍 得五神通  
守護法城 精進不懈 時千億人  
總持辯才 開化一切  
皆立大道 十四載人 聲聞緣覺  
無央數人 得生天上 以故歎講

法供爲最 假使有人 欲供養者  
當受持此 正法華經 分別如來  
善權方便 無有二乘 皆歸一道

爾時世尊告八萬菩薩因藥王開土緣諸菩薩等寧  
察斯四部衆無央數億天龍鬼神阿須倫迦留羅真  
陀羅捷沓和摩休勒人與非人比丘比丘尼清信士  
清信女聲聞緣覺菩薩現在目覩聞如來說斯經典  
一切衆會聞一頌偈一發意頃歡喜勸助佛皆授斯  
四部之決當得無上正真道意佛告藥王假使如來  
滅度之後聞斯經典一頌四句發意之頃代勸助者  
佛皆授決當得無上正真道前以奉侍億百千佛從  
億百千佛發意立願是等儕類愍傷衆人故來生耳  
從是經典受持一頌諷誦書寫載於竹帛銘著心懷  
念而不忘若聽誦音恭敬察之方如如來聖尊上句  
若以華香繪綵幢旛發意供養是經卷者又手向之  
稽首作禮則當謂之世間所歸又告藥王若族姓子  
族姓女假使能持一頌勸助歡喜聞經卷名若得聞  
名則當學是將來世尊展轉相謂族姓子族姓女來  
世便爲如來至真等正覺所以者何其受是經持讀  
書寫觀聽供養旛華繪綵雜香芬熏則當謂斯族姓

子女成無上正真道得滅度已若覩如來則普愍傷  
諸天世人從其所願而得自恣常生人間欲演斯經  
其人本已造微妙行因所作行則得生於嚴淨佛土  
常自觀緣欲講法故當知斯黨愍傷羣生佛滅度故  
故來生此則有反復如來所使其族姓子則謂彼人  
行如來事世尊所遣其有講說如來所宣斯法訓者  
若復不暢其身續蒙假使有人志性凶險常懷毒害  
發意之頃爲人所說不可之事其殃難測若一劫中  
誹謗如來毀斯人者罪等無異是皆悉爲如世尊種  
若族姓子講斯典時有小童子受是經卷白衣沙門  
若以一言惡事向之所不可意加於其人使聞惡言  
至誠虛忘宣揚惡聲則在凶罪猶如害意向於如來  
族姓子女受斯經典持諷誦讀而不遊行不爲人說  
當獲豐咎若受持經當以衣被甘餚飯食華香燈火  
琦珍殊妙供養奉散斯族姓子斯族姓女則爲大寶  
當爲作禮所以者何乃能一反聞斯經典若有聽者  
以所供養志願無上正真道故時佛頌曰

若欲住佛道 志慕已功德 當供養彼人  
持斯經典者 若樂諸通慧 恣意有所說  
則當受斯典 幷供養持者 說此經法者

90  
愍傷於衆生 世吼之所遣 來化羣生類  
假使持是典 所生常清淨 強勇而自來  
矜哀於衆庶 自在所欲生 最後於末世  
斯經爲最上 從彼得覩遇 所當供奉養  
恭敬彼人 亦當如佛 尋叉手禮  
自然聖道 若最後時 逢值斯典  
佛滅度已 受持經卷 常當供養  
如奉最勝 飯食之屬 諸味具饍  
房室牀臥 衣被億數 一反聞之  
崇進如是 如來則授 其人之決  
佛遣彼士 來在人間 若有最後  
值遇斯典 設使聞者 書寫執持  
於今佛在 現於目前 謂謗如來  
具足一劫 心中懷恨 面色改常  
其人卽獲 無數殃疊 設有受持  
是經卷者 而分別說 爲他人解  
若有誹謗 此等倫者 其罪過彼  
不可計數 假使有人 面現讚佛  
而又十指 具足一劫 清淨志求

斯尊佛道 億百千垓 咨嗟諸頌  
稱詠法師 發心悅豫 其人獲福  
不可限量 用宣譽是 明智者德  
彼士獲福 復超於斯 而有人來  
供養學者 若於十八 億千諸劫  
其人供養 珍饌衆味 諸天香華  
細軟精妙 計劫之數 十八千億  
和聲悅顏 崎嶇以獻 若有一反  
聞是經者 得諸利慶 無極難比

佛告藥王菩薩吾每散告前後所宣經品無量甫當  
說者經卷甚多比擬世間一切諸法今此典頌名祚  
顯綽最尊第一普天率土所不信樂如來正覺無所  
毀敗於內宴居密從法師受斯典者則爲如來威力  
所護無能破壞乃前世時曾得聞之如來現在有聞  
斯典多有誹謗何況如來滅度之後難得值遇所欲  
志願而見覆蓋觀族姓子女爲如此也他方世界現  
在如來悉覩見之在所存立已身逮聞諸信力也善  
本功力也志願力也在如來室等頓一處斯之倫黨  
德如是也求如來永志存佛掌是乃前世願行所致  
佛滅度後若有信此正法華典者受持書寫供養奉

順爲他人說德乃若斯佛告藥王菩薩若有能說斯經訓者書寫見者則於其人起佛神寺以大寶立高廣長大不當復著佛舍利也所以者何則爲全著如來舍利其有說此經法之處諷誦歌詠書寫書寫已竟竹帛經卷當供養事如佛塔寺歸命作禮一切華香雜香芬熏琴瑟箜篌蓋繪旛若有衆生欲得佛寺稽首作禮者當親近斯經無上道教又告藥王多有菩薩出家爲道及凡白衣行菩薩法不能得致如是像經及見讀說書寫供養其有菩薩行菩薩行曉了權宜假使得聞是佛景模菩薩所行所行法者聽者信樂來入其中解達分眞卽受供養於一座上應近無上正真之道若有見者如是士夫入於斯義德不可計佛告藥王譬如男子渴極求水捨於平地穿鑿高原日日興功但見燥土積有時節其泉玄遠而不得水復於異時掘地甚多乃見泥水濁不可飲當奈之何其人不懈稍進得水於時男子覩本瑞應釋除狐疑無復猶豫吾興功夫積有日月今者乃能值得水耳如是藥王設有菩薩聞是經典而不受持諷誦學者去於無上正真之道爲甚遠矣是景模者諸菩薩業假使聞此正法華經諷誦精修懷抱在心而

奉行之爾乃疾成最正覺矣佛語藥王一切菩薩其  
有不肯受諷誦行者不能得至無上正真道最正覺  
也所以者何吾前以說班宣此言假使有人不樂斯  
經則爲違遠於諸如來此經典者道法之首衆慧之  
元成就菩薩若有菩薩聞此經典恐怖畏懼而不愛  
樂則當知之新學乘者若不恐怖則是久修菩薩之  
行若聲聞學遇是經法或恐或怖心懷畏懼爲憍慢  
恣佛語藥王如來滅度之後若有菩薩大士欲以是  
經爲四部說著如來衣坐於世尊師子之座然後爾  
乃爲四部衆宣傳此經何謂著於如來被服謂大忍  
辱柔和安雅是則名曰如來被服其族姓子當修此  
衣何謂世尊師子之座解一切法皆悉空寂處無想  
願是爲世尊師子之座又族姓子當作此住所坐若  
茲以此經法爲比丘比丘尼清信士清信女天龍鬼  
神廣分別說其心勇猛不懷怯弱志於大道開導四  
輩其族姓子若復處於他方世界化作化人及與眷  
屬比丘比丘尼清信士清信女頒宣此法設使有聞  
而不樂者吾起令樂必使愛喜若在閒居曠野之中  
有天龍神捷沓和阿須倫迦留羅真陀羅摩休勒吾  
遣化人爲說經法雖復向在異方刹土普當自現今

衆人見若受此典不識句義失其次緒使諷學者蒙其威神令達義次爾時世尊卽說偈曰

皆捐棄怯弱 而當聽此經 是法難得遇  
信者亦難值 如人欲求水 穿掘於高原  
數數積功夫 但覩乾燥土 彼觀自思惟  
其水爲甚遠 所掘深乃爾 繢見乾燥土  
然後轉漸覩 濕土稍稍現 爾乃心決疑  
今以得近水 其不聞是經 不數修行者  
其人離道遠 去佛慧若此 斯經深巍巍  
決諸聲聞事 遠聞此經王 聽之思惟義  
則得近大道 智者成聖慧 猶如見濕土  
爾乃知得水 當入於佛室 被服如來衣  
則處吾聖坐 明者乃說此 慈心入吾室  
忍柔和被服 解空師子座 所說無所畏  
設乃瓦石打 爲人見罵詈 故爲宣此法  
吾悉悉斯音 遊在億千土 吾身常堅固  
無思議垓劫 爲衆生分別 佛滅度之後  
爲衆去怨結 多遣諸化人 而說此經典  
比丘比丘尼 清信士女等 當供養此輩  
及諸來會者 石打杖撻罵 懷結而惡口

若有設此凶化人悉呵教假使獨自行  
而諷誦翫習不被無惡聲質直遊閒居  
其人在彼行晝夜一已身吾遣與共俱  
爲伴說此經

其人辯才無有罣礙多能明了  
隨順之法可悅人民億百千垓  
猶如佛聖之所建立假使有人  
不依此法則爲名曰諸菩薩逆  
學者遊行及有所坐得見諸佛  
如江河沙

七寶塔品第十一

爾時佛前七寶之塔從地涌出高二萬里適現繞佛  
超在虛空自然而立其塔殊好色若干變五種之華  
而雨其上紛紛如雪莊嚴校飾塔寺講堂以無數寶  
同共合成百千欄楯窓牖軒戶不可稱計懸衆旛蓋  
垂寶瓔珞諸明珠羅列虛空猶如衆星香鑪寶瓶  
滿中名香栴檀芬馨一切普熏三千大千佛之國土  
金銀瑠璃水精珊瑚琥珀碑碣碼礎以爲寶蓋其蓋  
高顯至第一天忉利諸天及四天王皆散香華供養  
七寶塔其塔寺中自然發聲歎言善哉善哉世尊安

住審如所言道德玄妙超絕無侶慧平等一猶如虛空實無有異時四部衆見七寶塔在於虛空高大嚴妙巍巍無量光耀輝煌靡所不照頌宣善哉歡喜踊躍又手而立瞻戴無厭時有菩薩名曰大辯見諸天人心懷猶豫乍悲乍喜欲得知此何所瑞應故前問佛唯然世尊今者何故七寶塔寺現大聖前高廣無極莫不見者而寶塔寺自然出聲讚曰善哉何所感動而有此瑞世尊則告大辯菩薩此寶塔寺有如來身完具一定而不缺減東方去此不可計會諸佛世界有佛號名多寶如來國曰寶淨本行道時而自發願吾會當以此正法華經當自修成使諸菩薩皆得聽受然後乃坐於佛樹下逮成無上正真之道其佛所念果如所言爲諸十方講說經法開化一切皆令得道於時其佛臨欲滅度普告諸天世間人民及諸比丘吾滅度後奉如來身全取其體一等完具興大塔寺若見塔者悉得其所功德難限于時其佛建立如是無極聖化十方世界其有講說此法華經吾七寶塔漏現諸佛所說經處其舍利身在七寶塔讚言善哉佛告大辯是七寶塔在于東方而處於下去是無量江河沙佛土在於虛空未曾出現今見能仁如

來正覺本行學道爲菩薩時用衆生故不惜身命精進不懈行權方便布施持戒忍辱精進一心智慧求頭與頭求眼與眼求鼻與鼻求耳與耳求手足肢體妻子侍從七寶車乘象馬衣裘國邑虛聚恣人所求無所愛惜自致得佛今故來現致敬能仁欲令能仁佛坐我所有師子金牀講正法華開化一切使蒙其恩能仁如來尋如所勸卽昇講堂師子之座分別敷演正法華經而說頌曰

設聞多寶佛 知其名號者 未曾畏終始  
不復遭苦患 多聞藥王師 假記名號者  
衆病自然愈 尋則識宿命 一切所供養  
奉法爲最上 分別空無慧 自致得佛道  
宣揚法華經 以示諸不及 解本無三乘  
順一無上真

佛告大辯今者多寶如來至真在斯塔寺遙聞說此正法華典是以涌出讚言善哉大辯菩薩復白佛言唯然世尊今我等類諸來會者欲得覩見多寶佛形願垂恩慈加以威神使諸來者各得其所開發大道佛告大辯菩薩多寶如來本亦自誓我之塔寺所至方面聽此經典設諸如來及四部衆欲覩吾身隨其

90  
1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 2  
十方之所欲願皆當得見咸共供養於此化像大辯  
欲知我身亦當感是十方諸佛一切世界所化如來  
講說法者皆令詣此爾時大辯菩薩復白佛言唯然  
世尊垂加大恩普現一切十方國土諸佛聖德佛默  
然可卽時演放眉間白毛微妙光明普照十方各五  
百江河沙等億百千數諸佛國土一切世尊各各普  
現止其佛土坐於樹下奇妙莊嚴師子之座與無央  
數百千菩薩在寶交露布好坐具珍琦殊異懸繪旛  
蓋垂於四面諸佛坐之爲諸衆生講說經法音聲柔  
和靡不解達百千菩薩啓受所聞東西南北四隅上  
下無數百千億垓難量江河沙等諸佛世界皆亦如  
是靡不見者時十方佛各各自告諸菩薩等諸族姓  
子汝輩當往詣忍世界見能仁佛如來至真并當瞻  
戴多寶世尊形像塔寺彼時於此忍界所有功勲善  
德殊雅威神自然而現七寶諸樹周帀而生其地悉  
變爲紺瑠璃以紫磨金而爲長繩連綿莊飾八交露  
道其地平正除諸郡國縣邑村落大海江河川流泉  
源皆不復現但見自然諸天香爐燒衆名香普雨天  
華於此佛土應時移徙諸天人民在他佛國時諸衆  
會現在七寶諸交露帳七寶諸交露帳莊嚴殊妙不

可稱量徧此佛土時彼十方一切諸佛各有侍者亦復皆來詣此忍界各各至於衆寶樹下此諸寶樹高二萬二千里枝葉華實各各茂盛斯寶樹下有師子牀高二萬里皆以琦寶衆珍爲座如來坐上如是比像於此三千大千世界但見諸佛靡不周徧非是釋迦文如來至真等正覺之所變現也各從十方諸佛刹土而來到此顯示大道無極之德爾時世尊釋迦文尼變諸如來所化形像在於八方各二萬億所有國土皆無地獄餓鬼畜生移徙諸天及阿須倫在於他方諸佛世界令二萬億諸佛國土地紺瑠璃皆以七寶變成樹木其諸寶樹高二萬二千里枝葉華實各各茂盛諸師子座高二萬里此諸佛土而皆平正無有河海衆流泉源亦無諸山日隣大日隣山須彌山王鐵圍大鐵圍山一一佛土其地平等七寶合成各各莊嚴諸寶交露快樂難量徧布諸華燒衆名香諸寶樹下各有如來坐師子牀如是比類復更別有二萬世界能仁如來各爲諸方而持莊嚴顯現清淨皆爲諸佛作其處所此諸佛土亦無地獄餓鬼畜生諸天龍鬼神及阿須倫亦復移徙諸天人民在他佛土此諸佛土地紺瑠璃以紫磨金而爲寶繩連綿諸

樹八重交道又彼諸樹高大好妙亦復如前師子之  
牀莊嚴校飾其地平正無有山河江海之事香華衆  
寶珍琦交露垂明月珠亦復如前行來進止道徑由  
路等無差特爾時釋迦文佛所化如來在於東方恒  
沙等刹班宣道教皆復來至十方世界各三千億諸  
佛正覺皆來詣此而悉坐於師子寶牀各取寶華授  
諸侍者諸族姓子汝等往詣耆闍崛山能仁佛所致  
吾名字敬問無量聖體康強力勢如常所遊安耶以  
此衆華供散彼佛及諸菩薩衆弟子上宣我所言多  
所開化於是釋迦文如來至真見諸所化各各坐於  
師子之座及諸侍者皆來集會賚華供養卽從座起  
住於虛空四部之衆悉亦各起叉手而立佛以手指  
開七寶寺講堂之戶巨然通徹晃若日出譬如開於  
大國城門而以管籥去其關軸內外無礙釋迦文佛  
以手兩指開七寶寺講堂之戶現其威德不可稱限  
亦復如茲如來適開七寶寺戶多寶如來至真等正  
覺身卽現矣坐師子牀肌色如故亦不枯燥威光端  
正相好如畫口重宣言善哉善哉釋迦文佛說此經  
典何其快乎吾以欲聞此經法故故自出現時四部  
衆見多寶如來至真等正覺聞其滅度去世已來不

可稱計億百千劫聽言善哉甚大驚怪初未會有卽以天華供養散於釋迦文佛多寶如來時多寶佛則以半座與釋迦文佛七寶寺中有聲出曰釋迦文佛願坐此牀釋迦文佛輒如其言時二如來共同一處在於虛空七寶交露坐師子牀時四部衆各各念言諸佛至真道德高遠而不可逮巍巍難量不可稱限唯願如來垂意見念加威神恩令我等輩俱處虛空佛知所念現神足力使四部衆自然超上處於虛空時釋迦文佛告四部衆諸比丘等於此忍界誰能堪任說此經典今是其時亦是大節如來現在若減度後當受此法持諷誦讀今如來身幸欲減度比丘當捨如來所供養供事之宜奉順恭敬於此經典於是說頌曰

無極大聖	來至於斯	導師因現
奇妙塔寺	比丘欲知	聽法故舉
何人省是	不興精進	滅度以來
無央數劫	今日乃能	欲聽經典
以故發來	因緣宣教	得度無極
法之善利	於往古世	自與此誓
導師所願	正由此道	滅度以來

久遠乃爾 於今復現 十方世界  
自在去是 悠悠極迥 億百千數  
如江河沙 因經典故 而發詣此  
滅度聖將 於諸國土 而自現矣 各各遊在  
於諸國土 一切志樂 聲聞之行  
皆欲將護 於正法故 何緣當今  
經典久存 因由依附 諸佛之道  
在無央數 諸佛世界 聚合衆生  
遊至於斯 修治嚴淨 神足之力  
各各自說 如是廣義 何因得說  
於茲法眼 諸佛住此 不可稱計  
在於樹下 而處道場 其身真諦  
巍巍億垓 諸導師衆 坐師子牀  
清淨常正 明顯如日 若如大光  
除諸陰冥 柔軟美香 熏於十方  
供養達至 懈傷世者 其有度脫  
一切衆生 恩德流布 常通於此  
吾滅度之後 其持此經典 速逮得受決  
目見世導師 佛滅度之後 其多寶仁賢  
聞見師子座 塔寺所在處 我身次在是

億千來至此 最勝子所由 堪說此經典  
若聞此法 能受究竟 則爲奉事  
歸命我身 幷及多寶 如來之尊  
順奉現在 十方諸佛 復及今來  
諸導師衆 莊校聖體 殊妙難量  
悉爲供養 具足無限 用遵修受  
此經典故 以曾見吾 聞所講說  
亦復更覩 寺中世尊 幷餘無數  
諸導師衆 從百千億 國土至此  
思念族姓子 懃傷子衆生 此處難可值  
諸導師所樂 諸無數經卷 猶如江河沙  
佛雖說彼經 不足爲奇特 其度須彌山  
則以手舉持 跳著億千國 不足以爲難  
設有分別說 章句述百千 聞億千佛國  
不足以爲難 若住極上界 爲天人講說  
宣暢無量經 不足以爲難 佛滅度之後  
末世能堪受 頒宣此經典 爾乃爲奇特  
若以一手拳 提畫於虛空 至於無所至  
不足以爲難 我滅度之後 若歸如是像  
來世書是經 爾乃爲奇特 設取十方地

舉著於爪上 擎行恣所遊 昇置于梵天  
此者不爲難 精進無奇特 不如於來世  
須臾讀此經 假使劫燒時 人踐火中行  
及擔草不燒 不足以爲奇 我滅度之後  
若持此經典 爲一人說者 爾乃爲殊特  
假使有受持 八萬諸法藏 班宣如所說  
以示億千人 比丘於彼世 開化諸聲聞  
住於神通者 不足爲奇異 設持此經典  
信喜而愛樂 數數咨講者 爾乃爲殊特  
若無數億千 興立無著塔 六通極大聖  
猶如恒邊沙 佛滅度之後 設持此經者  
其人得功報 過是難限量 百千諸世界  
說法不可計 今我亦宣暢 佛慧所分別  
計是經典者 族姓子講說 現在如來前  
則侍諸佛身 一切經中尊 其奉持此典  
後世持是經 賢者乃堪任 須臾持此經  
則爲奉敬佛 一切諸導師 是經難值遇  
一切十方佛 爲現所咨嗟 勇猛有威神  
神通爲已達 名德遠流布 諸佛所愛樂  
因持此經故 遣得寂定地 導師滅度後

則爲天世人 顯示作眼目 宣布此經故  
於當來之世 須臾說此典 其一切衆生  
稽首禮明者

梵志品第十二

時能仁佛告諸衆會吾往無數難稱限劫求法華經  
未曾懈倦時作國王遵修大法六度無極布施金銀  
水精瑠璃琥珀珊瑚珠玉碑礎碼礎頭目肌肉手足  
肢體妻子男女象馬車乘不惜軀命時人壽長不可  
計會吾用法故棄捨國位委政太子行求大典擊鼓  
振鐸宣令華裔有能爲吾演大經者吾當爲僕供給  
走使時有梵志而報之曰我有大典正法華經若能  
爲僕吾當惠與佛告比丘吾聞其言歡喜從命奉侍  
資糧未曾懈廢奉侍千歲使無僥渴佛時頌曰  
擊鼓振鐸 宣令遠近 欲求大典  
正法華經 若見賜者 吾當爲僕  
趨走役使 紿所當得 甘心樂聞  
不敢疲倦 所當供養 不惜身力  
趣欲聞受 正法華經 願及十方  
不適爲已 其王精進 未曾休息

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

衣食供命

不求甘綺

愍念衆生

諸未度者

尋時卽獲

正法華經

佛告諸比丘時國王者則吾身是也梵志者調達是也令吾具足六度無極大慈大悲成四等心三十二相八十種好紫磨金色十種力四無所畏四事不護十八不共威神尊重度脫十方皆由調達恩德之力調達於後無央數劫當得作佛號曰天王如來至真等正覺明行成爲善逝世間解無上士道法御天人師爲佛衆祐世界名天衢時天王佛廣說經法如江河沙衆生得無著證無數不可計人志在緣覺如江河沙無量庶民皆發無上正真道意至不退轉其佛當壽二十中劫滅度之後正法當住二十中劫不散身骨合全舍利起七寶塔高六十里周八十里普天下人悉住供養華香妓樂歌頌功德繞塔作禮不可計人得無著證無央數人志緣覺乘不可思議無量天人發無上正真道意志不退轉若族姓子族姓女逮得聞是正法華經心中燿然而無狐疑杜塞三趣不墮地獄餓鬼畜生便當得生十方佛前感受正化若在天上世間豪貴若在佛前自然化生七寶蓮華於時下方多寶世尊所從菩薩號曰智積自啓其佛

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

當還本土時能仁佛告智積曰吾有菩薩名溥首童真且待斯須可與相見宜叙闊別各講經典乃還本土於是溥首坐七寶蓮華華有千葉大如車輪與諸菩薩俱坐寶華從龍王宮涌出大海溥首童真皆退下華禮二佛已與智積菩薩對相問訊智積菩薩問溥首曰所詣海淵化度幾何答曰其數無量不可稱限非口所宣非心所計如今不久自當有應所說未竟尋有蓮華從海湧出在虛空中無數菩薩皆坐其上此皆溥首在海之所化悉發大意其志無上正真道者普在空中講大乘事本發聲之意者在於虛空說弟子行解知大乘溥首前謂智積曰在海所化其現如茲智積菩薩以頌問曰

至仁慧無量 化海衆寶數 唯爲露聖旨

分別說其意

溥首答曰在於海中唯但敷演正法華經智積又問其法甚深尊妙難及能有尋時成佛者乎溥首答曰龍王有女厥年八歲聰明智慧與衆超異發大道意志願弘廣性行和雅而不倉卒便可成佛智積又問我覩能仁是仁大師本求佛道爲菩薩時積功累德精進不懈歷劫難計乃得佛道不信此女便成正覺

12345678920

12345678920

言語未竟女忽然現稽首作禮繞佛三匝却住讚曰  
功祚殊妙達 現相三十二 諸天所敬侍  
神龍皆戴仰 一切衆生類 莫不宗奉者  
今我欲成佛 說法救羣生

時舍利弗卽謂女言仁雖發意有無極慧佛不可得  
又如女身累劫精進功積顯著尚不得佛所以者何  
以女人身未階五位一曰天帝二曰梵天三曰天魔  
四曰轉輪聖王五曰大士其女卽以一如意珠賈當  
是世時孚供上佛佛輒受之女謂舍利弗及智積曰  
吾以此珠供上世尊佛受疾不答曰俱疾女曰今我  
取無上正真道成最正覺速疾於斯變成男子菩薩  
尋卽成佛相三十二衆好具足國土名號衆會皆見  
怪未曾有無央數人天龍鬼神皆發無上正真道意  
三千世界六反震動三萬道跡得不退轉皆當逮成  
無上正真道舍利弗智積菩薩默然無言

## 正法華經卷第六

### 音釋

**篋** 苦協切 箱屬 **淘汰** 汰徒刀切 洗濯也 **囊** 奴胡切 觀 **豐** 許

**切隙** **崎嶇** 崎去奇切 嶇豈俱 **綽** 昌約切 頒 通還切

**籥** 以灼切 與鑰 **跳** 他弔切 越也 **鐸** 徒落切 鑰屬 **衢** 其俱切

七

休寧沙門如顯性覺海嶽洎全本邑居士程起家程有功清信士吳源共施刻此正法華經第六卷安城釋可震對南昌萬承明書上元縣祁沂刻萬曆戊申冬十月徑山寂照庵識

正法華經卷第七

西晉三藏竺法護譯

勸說品第十三

爾時有菩薩名藥王復有菩薩名曰大辯與二萬菩薩俱於世尊前面自啓白唯願大聖自安宣教勿以爲慮如來至真滅度之後我等當共分布斯經講說示人假使有人懶悞自用性不循調薄德無福心懷自大著供養利不備善本離於解脫難可成就我等世尊興忍辱力在於彼世受此經典書持誦說供養奉事懷佩在身除於吾我班宣斯經報安住恩爾時

會中五百比丘學不學者前白佛言唯然世尊吾等  
堪任宣布此經又復大聖他方世界如來聲聞諸學  
不學佛悉授決當成無上正真之道一切叉手而禮  
世尊八十比丘復白佛言大聖自安勿以爲慮滅度  
之後當廣解說傳此經道亦當宣布他方世界所以  
者何此忍世界人多憍慢本德薄少心常懷亂如火  
毒然迷惑三界不能自安爾時大敬達比丘尼與六  
千比丘尼俱瞻戴尊顏不以爲狀啓白佛言道德至  
尊巍巍無量超絕虛空無能及者佛卽告曰汝輩瞿  
曇彌勿懷悒悒而爲愁感悲顏觀佛恨言如來而不  
班官獨不見蒙授無上至真正覺之決一切衆會等  
共和同爾乃發布授衆人決當至無上正真之道皆  
一等味味無有異從是以往汝當遭值三萬八千億  
諸佛之衆供養奉事當爲菩薩常爲法師此學不學  
六千比丘尼爲諸衆生菩薩法師次第具足菩薩行  
已當成爲佛號曰一切衆生咸敬如來至真等正覺  
成佛已後開化人民各各展轉共相授決當成爲佛  
度脫無數不可計人於是羅云母比丘尼及持名聞  
各心念言今佛世尊而不愍念獨見遺棄於時大聖  
告名聞比丘尼今我班宣告語遠近當於十萬億佛

修道常爲法師奉菩薩所行遵修具足當得作佛號  
具百千光幢旛如來至真等正覺明行成爲善逝世  
間解無上士道法御天人師爲佛衆祐其世界名仁  
賢爾時其佛光明威神無數百千壽不可限時大敬  
遠及羅云母比丘尼等得未曾有驚喜悅豫卽說此  
偈而嗟歎佛

世尊所開示 爲衆之導師 開化於世界  
并及於天人 天人所奉事 今者見慰撫  
以爲大導師 充滿悅我意

比丘尼說此頌已白世尊曰唯然大聖我等信樂是  
佛法訓堪任說讀又及餘人他方世界於是世尊顧  
眄八十億垓百千逮諸總持開士講不退轉法輪時  
諸菩薩見佛照臨尋又手啓白唯願大聖以斯經典  
付授我等講說宣布得此經卷專惟佛德諸族姓子  
欣仰世尊俯察已身前世所行平等之願則於佛前  
而師子吼如來減度後若此經法在於十方我等書  
寫受持諷誦思惟其義分別布露顯化餘人亦令如  
斯承佛聖旨我之朋黨處殊異土大聖加恩將接我  
等使得成立爾時諸菩薩大士同心等意佛前說頌  
曰

唯願世尊 默然安聖 佛滅度後  
光闡景訓 然後末世 恐有患難  
當普班宣 分別說之

若撾捶罵詈 以石打擲者 大聖往來世  
鄙當忍此愚 語言難曉了 誣謗癡惰慢  
然後處山巖 無獲謂有得 無便於智慧  
當何以報答 獨行順心志 懷惡爲無忍  
在居貪惡聲 當爲說經法 所講言決除  
猶若此六通 凶暴秉毒心 處寂行斯想  
入燕而獨住 不慕罵詈對 是我等無忍  
猗著於利養 則是外道人 所說爲已施  
於經自精進 猶以供養故 於衆會中說  
宣吾等名譽 若至國王宮 大臣及寮屬  
并梵志長者 若餘比丘所 謗毀說我惡  
所行如邪道 吾當悉忍此 常奉侍大聖  
爾時雖憂患 若使能忍辱 以斯佛所說  
悉當呵教人 劫亂比丘諍 凶暴大恐懼  
悉罵詈我等 諸比丘如鬼 在世行恭敬  
皆令忍苦患 以順柔軟性 故當說此經  
吾等不貪身 亦不惜壽命 當堪奉持此

志願於佛道 世尊具知之 如凶惡比丘  
然後來末世 當分別開解 顏色常不悅  
數數犯不當 遊行不以時 衣服多不正  
假使今世雄 減度後末世 在衆會勇猛  
分別說是經 若行求入城 優有所慕索  
所居當施與 佛智不令墮 用愛樂世源  
興修仁善心 少欲行節限 逮善寂滅度  
一切世光耀 十方悉來會 我當言至誠  
悉見心不虛

安樂行品第十四

於是溥首大士白佛唯大聖此諸菩薩恭敬世尊所  
當勸悅難及難及何時應當爲一切衆說斯經典佛  
語溥首曰菩薩先處二法乃應講經一曰威儀二曰  
禮節何謂菩薩解知威儀假使持心忍辱調柔將護  
其意畏不自立其志如地不見有人不見有人而行  
法者觀自然相諸法本無此諸法者衆行之式亦無  
想念是謂威儀何謂禮節設令菩薩不與王者太子  
大臣吏民從事不與外道異學交啓不尚世典讚叙  
音詔合偶習俗不貪不學不與屠殺漁獵弋射雞鴉  
羅網賊害從事不與歌舞遊戲衆會同處不與聲聞

比丘比丘尼清信士清信女從事亦不親近行禮問  
 訊不共止頓不與同志經行燒香散華然燈除其往  
 至講經會時唯與講會而共從事縱有所說亦無所  
 著是爲禮節又語溥首菩薩大士不媿家居宗室親  
 屬不殷勤思見內人女弱獨說經法亦不煩數詣羣  
 從幼童男女及餘異人而說輒語所不當講不爲定  
 意疾癩說經不與住立亦不同類亦不與一比丘獨  
 入房室除念如來精進爲行縱爲女人有說經緣不  
 於是中汙染法味不令受取而廣義理不與沙彌比  
 丘尼童子童女共在一處常好宴坐綢繆好習辟屏  
 間居是爲禮節又語溥首菩薩大士觀一切法皆爲  
 空無如所住立已墮顛倒所立正諦常住如法專秉  
 身心不動不搖不退不轉躅捨滅盡不生不有無有  
 自然無爲無數無所可有逮無所有除諸言辭不住  
 無爲無想不想得伏諸想假使菩薩乙密觀察斯一  
 切法欵欵修此所當行者常住威儀禮節二事世尊  
 欲重解現此義而歎頌曰

若菩薩好樂 說此經典者 於後當來世  
 勇猛無怯劣 順威儀禮節 善明清白行  
 國王及太子 大臣僚屬吏 外道若異學

屠獵惡害品 抑制交啓習 不與通往返  
比丘放羅漢 除立於法律 不與自大俱  
復遠犯禁者 比丘比丘尼 調凝諷話談  
捨離清信女 不興無益言 現在欲獲法  
常當止息非 好住減度地 是謂爲威儀  
假使不肯往 諮問於道法 斯爲持法說  
不怯無所著 衆生有癩疾 若親屬宗室  
母人諸細色 悉當捨離去 不與是等俱  
而積植德本 當捨販賣業 諸慢不恭敬  
棄捐諸住立 不爲已身害 若干種蟲豸  
不習食噉肉 繼捨諸非法 喜瞋恚恨者  
所行乃如是 亦不與談語 不與強顏俱  
及餘自用性 作行如是者 皆當屏除之  
明者設有緣 爲女人說經 而不獨遊行  
不住於調戲 設入出聚落 數數行求食  
將一比丘伴 常志念於佛 佛故先示現  
此威儀禮節 其奉持斯典 則當勤行之  
上中下劣人 若不行法者 元元常供養  
一切皆至誠 丈夫無想念 堅固行勇猛  
不知一切法 亦不見滅盡 一切諸菩薩

是謂爲威儀 如常行禮節 且當聽察此  
斯當講說 無爲之法 一切不興  
亦無所生 建志常立 觀採空義  
此爲明者 所行禮節 有所念者  
悉顛倒想 以無爲有 用虛作實  
雖有所起 諸法無生 因想蹉錯  
而生諸有 心常專一 善修三昧  
建立於行 若須彌頂 所住如此  
普觀諸法 是一切法 猶如虛空  
譬如虛無 等無堅固 不念取勝  
無所棄捐 諸法所處 無有常名  
是爲明者 所行禮節 我滅度後  
若有比丘 敢能守護 如是法則  
無所怯軟 心不起想 爲無數人  
說此經典 其明喆者 所念以時  
若入屋室 所行若茲 觀察諸法  
一切普淨 宓然說義 而不動搖  
國王帝王 及與太子 欲聽聞法  
皆供養之 幷餘長者 及諸梵志  
立諸眷屬 皆無所欲

又語溥首如來滅度之後欲說此經住于安隱已立  
安隱不懷謾詭諂無眩惑心乃說經法藏戢身懷或載  
竹帛爲他人說亦不多辭亦無所生亦不輕慢諸餘  
比丘爲法師者亦不歌歎亦不毀訾異心比丘爲聲  
聞者未曾舉名說其瑕穢亦不誹謗亦不仇怨思想  
待之未曾毀訾居家行者無所志願不違彼行亦無  
所想行來安住而立義要往來周旋若詣法會自護  
已身行無所失而說經法若有請問心無所倚離聲  
聞乘有所發遣覺了佛慧佛時頌曰

智者常安

住於佛道

先隱定坐

爾乃說經

若當敷座

務令柔軟

若干種具

所置綺粲

體常襯著

淨潔被服

於七七日

而習經行

猶如黑雲

在於虛空

合集積累

弘雅功德

所處之座

具足篋藏

牀足堅固

平坦顯赫

無數坐具

氍毹綻綻

儼然正首

尊其視瞻

安詳昇處

高廣法座

而普等心

爲一切人

國主帝王

太子大臣

及諸比丘

比丘尼衆

清信高士

及清信女 應所樂聞 爲講無量  
明智無限 次第剖判 爲演種種  
微妙之義 追逐侍後 請求問義  
斯睿喆者 復爲解說 一而入神足  
柔順之忍 其有聽聞 悉得佛道  
斯智慧士 皆爲一切 進却棄除  
懈怠疲厭 常以慈心 爲衆說經  
未曾起于 勞廢之想 畫夜歌誦  
詠尊法訓 分別演說 億百垓喻  
普能勸悅 諸會者心 無敢生念  
欲危害者 若得供養 飲食之具  
牀臥所安 衣服被枕 痘瘦醫藥  
而無僥冀 不從衆人 有所請求  
除其贍勞 住廟精舍 欲令衆庶  
悉解佛道 若一切人 來聽經法  
我乃加豫 如獲大安 佛滅度後  
若有比丘 宣揚經法 無所希望  
無所妨廢 不遭苦患 常察精進  
離於疾病 無能爲彼 造恐怖事  
不被杖痛 無誹謗想 身無疲厭

不有所患

其人住忍

得力如是

其明智者

所處安隱

有所存立

如佛言教

若以咨嗟

億百功德

一切稱譽

不能究竟

又語溥首如來滅度若有菩薩於是經卷懷疑不了  
若說教化聞不堅固性不調和見餘菩薩求大乘者  
爲造虛妄而誹謗之見聲聞緣覺比丘比丘尼清信  
士清信女若值菩薩心爲躊躇不卽往見其族姓子  
則遠無上正真之道而不得近佛天中天也所在行  
處假使究竟不蒙福力不成最正覺菩薩得三乘猶  
如師子在於林樹若有猶豫自然遠離不樂所樂亦  
不不樂若於衆生修行慈力至於如來興大父想見  
諸菩薩念如世尊及諸處家未離塵穢寬弘等敬禮  
節恭肅淨諸法義無疑無結嚴一切法謹慎安諦欽  
順平等不著經法極有所樂亦無所至所在晝夜敬  
護此典溥首是爲三法之行菩薩觀時然後乃說造  
安隱行不被煩惱亦不燒害說此經法者與同學者  
等心道友若講若聞信樂斯典誦持書寫載之竹帛  
供養奉侍德不可量說已安住則乃頌曰

若有嫉妒

懷難億數

其法師慈

當遠憎惡 有明智者 不造貪著  
 若欲讀斯 正典模者 未曾詐謗  
 說人之惡 亦不墮非 諸疑邪見  
 心常燿然 無有沈吟 以愍傷故  
 得了此定 安住之子 亦能忍辱  
 其人常屏 貢高自大 數數講誦  
 佛之典誥 未曾以此 持作懈倦  
 其有菩薩 在十方者 懇傷衆生  
 於世興行 順造恭敬 學聖慧者  
 皆當念之 是我世尊 思念諸佛  
 兩足之上 視諸菩薩 如視父母  
 設有求道 無有情欲 棄捐吾我  
 自大之想 假使聽省 如是像法  
 其明士等 當自慎護 所行安隱  
 常得調定 將御佛道 救億衆生  
 又語溥首如來滅度後若菩薩大士奉行斯典常以  
 時節其是比丘當行慈愍向諸白衣出家寂志一切  
 羣生行菩薩道者常念過去世行大乘者善權方便  
 演真諦義若聽聞者不知不了不悅不信不省不綜  
 反自歎說我當逮得無上正真道成最正覺威神足

力而欲得飛溥首當知吾見斯等佛滅度後菩薩有  
四事說法而不諍怒何等爲四爲諸比丘比丘尼清  
信士清信女所見奉敬帝王太子大臣羣僚郡國人  
民所見供養長者梵志悉共承順虛空神明無數天  
子聽所說經天龍鬼神侍衛其後皆營護之是爲四  
若入縣邑還歸室宅晝夜悉來諮問經法若爲解說  
分別所歸莫不歡喜所以者何溥首欲知皆佛所建  
立加此經恩去來今佛盡從斯生亦護是典若於忍  
界聞正法華品服聽聞名者甚難值遇溥首譬有大  
力轉輪聖王威德弘茂順化所領諸餘敵國未率伏  
者不敢闖闊若轉輪王興舉衆兵當有所討不賓之  
臣欲拒大邦雄猛將士奮武剋捷莫不稽頽王用歡  
喜斷功定賞封城食邑賜之土田七寶琦珍象馬車  
乘男女奴婢元首効勳勲殊特者王解髻中明珠賜  
之所以者何臣當國疆華裔乃康如來正覺亦復如  
是爲大法王無極道帝自伏其心以法教化以德消  
害以慧戰鬪降諸法王無極之衆無量經典百千要  
義咸施羣生無所祕弊詔平等城其見身魔能與魔  
戰以賢聖法攻姪怒癡降魔官屬盡三界患至于滅  
度所作剋捷則大勇猛於後無壞亦無有實因由諸

虛致此世間如處色像一切因緣普諸世界古今以來無有信此正法華經未曾暢說所以說者由諸通慧大慈所致如大聖帝髻中明珠以爲世尊第一法要緣是趣行如來使聞深妙之典往古來今諸行班宣斯經爲最消除一切緣起之患猶如聖帝珍重愛護髻中明珠久乃解出以賜有功如來如是夙夜寶護最妙無瑕從來甚久立諸法頂今日加哀乃演散耳世尊欲重顯現要義而歎頌曰

今日如來

慈心之力

常愍衆生

羣萌之界

安住咨嗟

最尊經卷

故分別說

如斯典誥

最後世時

志菩薩法

若使出學

及居家者

若聞此經

慈心戰慄

一切普現

不得詐謗

吾本初始

得佛道時

如今如來

現在之時

設能逮聞

於是尊經

則便建立

億權方便

猶如勢力

轉輪聖王

戰鬪降伏

外異國王

得賜象馬

車乘篋藏

又加封邑

城郭郡土

或有得賜

手足寶鏹

微妙之色

紫磨金珍

真珠夜光 碑磲碧玉 種種殊別  
奇財妙異 若干諸物 一各用賜之  
使一切衆 一踊躍驚喜 一覩所立功  
怪未曾有 最後解髻 明月寶施  
佛亦如是 今爲法王 忍辱之力  
無極慧音 常行慈愍 與發哀護  
以法等化 一切世間 観諸衆庶  
憂惱之患 講說經法  
曉知衆生 所應方便 億千之數  
以爲盡源 分別經卷 於時法王 億百千垓  
志力猛慧 便說此經 如髻明珠  
最後世時 正典所處 無極大聖  
皆無及者 欽仰是經 以知黎庶  
識練幽微 慧明者聞 未曾輕講  
如是像法 斯尊道者 吾以演現  
如佛所言 彼人未曾 有疵瑕欲  
無有疾病 衆患所難 則於末後  
將來之世 便卽逮成 無上真慧

殊勝差特 普當具足 諸四部衆  
亦復順遇 若有聞者 除身諸漏  
怪其無爲 悉又手歸 已身景耀  
所照光光 其奉行是 所獲若此  
得成正典 而轉法輪 則覩弘模  
及見最勝 夢中聞見 百福德相  
紫磨金色 佛所說經 設得聞已  
爲衆會說 及諸親族 皆悉具足  
又復所護 一切除棄 若使臥夢  
所見如是 悉捨遠離 而行出家  
皆得往至 於佛道場 卽便處於  
師子之座 是爲求道 所獲利義  
所謂七寶 悉歸於斯 修此則奉  
最勝如來 以得佛道 存立慧施  
卽轉法輪 無有諸漏 爲諸四輩  
而說經法 不可思議 億千劫數  
分別講說 無漏之法 教化無數  
億垓衆生 夢中所見 如斯色像  
滅度因緣 悉無生死 淬首當知  
常志道者 多所教化 不可限量

最後末世 求斯尊法 分別廣說

安住所演

菩薩從地涌出品第十五

於時他方世界八江河沙等菩薩大士各異形服來  
詣佛所稽首于地長跪叉手白世尊曰鄙之徒類來  
造忍界欲聞斯典受持諷寫精進供養奉行如法唯  
願大聖垂心於我如來滅後以正法華經加哀見付  
世尊告曰止族姓子仁等無乃建發是計今此忍界  
自有八江河沙等大士一一大士各有眷屬如六十  
億江河沙等菩薩大士後末世時皆當受持分別班  
宣時此佛界周普無數億百千垓諸菩薩衆自然雲  
集顏貌殊妙紫磨金色三十二相莊嚴其身在於地  
下攝護土界人民道行倚斯忍界聞佛顯揚法華音  
聲從地涌出一一菩薩與六十億江河沙等諸菩薩  
俱營從相隨一心一行無有差別或半江河沙百千  
菩薩來者或四十分江河沙或五十分江河沙或百  
分江河沙或四百分江河沙或五百分江河沙或千  
分或百千分江河沙或億百千分江河沙等菩薩各  
各朋黨相隨來或復無數億百千菩薩眷屬而來至  
者或有二百千同行修菩薩道或有百千各有眷屬

或有千眷屬或有五百眷屬或四百眷屬或三百眷屬或二百眷屬或百眷屬或五十眷屬或四十眷屬或三十眷屬或二十眷屬或十眷屬或五眷屬或四眷屬或三眷屬或二眷屬或一眷屬或獨而至不可稱限其數難喻從地涌出或從上下或從四方來至忍世界悉住空中見於滅度多寶世尊能仁大聖各處七寶樹下坐師子牀尋稽首禮二如來至真等正覺右繞三匝却住一面或有菩薩以若干品奇妙之義咨嗟二尊歎詠諸佛從始以來假使具足五十中劫不能究暢能仁世尊爲勤苦行與佛別來亦復如是四部衆會等無差特亦復默然爾時世尊卽如色像現其神足令四部衆悉得普見又使念知此忍世界諸菩薩衆於虛空中各各攝護百千佛土諸菩薩衆皆滿具足百千佛土又此大衆有四菩薩以爲元首其名曰種種行菩薩無量行菩薩以清淨行菩薩建立行菩薩是爲四於無限無量塵數雲集大會菩薩之上最也於是四菩薩大士各與大衆不可思議部部住立於世尊前又手白曰大聖體尊起居康強蠲除衆病所行安耶羣生各各善順律行處于清涼無衆患乎此類將無興墜喫谷時四菩薩大士以偈

讚曰

世雄闡光耀 所行康強耶 救脫現在者

衆行無患難 衆生善因室 快受諦清淨

得無起疲狀 寧受世吼命

爾時世尊告衆大會諸菩薩曰諸族姓子佛所行安無疾無患衆庶各各悉受律行善學道教不敢興貳欲至嚴淨所以者何斯之品類乃於往古諸平等覺各各作行是諸聲聞信樂吾教入于佛慧又各各異三乘學者住聲聞乘我悉立志入佛大慧時諸菩薩而歎頌曰

善哉快世尊 我等悉勸助 乃令衆生一

善化微妙律 欲得聞大聖 教命詢深要

聽之歡喜信 乃入法供養

於是世尊語大會菩薩曰善哉善哉諸族姓子誠如所云如來所詔各隨權宜不違本旨時彌勒大士及餘八億江河沙菩薩俱舉聲而歎頌曰

從古以來 未曾見聞 乃有爾所

菩薩之衆 從地涌出 住世尊前

供養歸命 是等儕類 從何來乎

彌勒卽知八億江河沙菩薩心之所念尋時叉手以

偈問曰

無央數百千 於算巨億載 不可稱限量  
未曾見菩薩 來詣兩足尊 積因是何等  
大通所從來 其像巨億長 一切志強勇  
雄猛爲大聖 端正可欽敬 今爲所從來  
世尊一一見 慧雅諸菩薩 眷屬無央數  
猶如江河沙 其數超江河 眷屬無央數  
諸菩薩眷屬 皆逮正覺道 如是羣英倫  
集會禮大聖 具足滿六十 百千江河沙  
其數過於彼 眷屬無思想 五百江河沙  
或四或三百 或二百江河 諸營從如是  
其限復殊此 或五或復十 一一諸眷屬  
世尊大聖子 斯等緣何來 至于導師所  
或四三或二 或一江河沙 江沙數各來  
伴侶悉善學 甚多不可限 除住空中者  
於億百千劫 不可卒合聚 半江或三分  
或十或二十 具足衆立行 明哲衆菩薩  
俱住於空中 其限不可量 現別無彼此  
億劫行清淨 又無量異部 眷屬不可量  
億億復超億 或有半億者 或十或二十

五四三或二 諸雄從眷屬 無能籌量者  
身各自修行 寂寢樂等道 恬怡如虛空  
別來者無限 猶如江河劫 莫能有計者  
在精舍寂室 各從其方來 一切大神聖  
皆用尊故至 諸菩薩雄猛 何從忽現此  
誰爲彼說經 誰立於佛道 爲顯何佛教  
建立何佛行 細微各可敬 普從四方來  
因明日神足 大慧忽然現 於羸曠世界  
能仁令充備 仁賢諸菩薩 倫黨自然至  
從生出來 未見如斯變 願說其國土

大聖哀盡名 十方所從發 各懷十八法  
吾未曾得見 如斯等菩薩 我爲最勝子  
未曾見聞此 今斯若干衆 能仁願說行  
菩薩無數千 百垓難可限 諸億千無量  
本爲何所處 諸菩薩勇猛 志性不可量  
如是之等類 大雄願說之

爾時他方世界無央數億百千垓諸如來至真等正  
覺普從十方詣能仁如來勸說法者各各坐于七寶  
樹下師子之牀是諸如來侍者各各見諸菩薩無量  
大會部部變化從地涌出各各住立自問其佛此諸

菩薩大士之等從何所來不可計量無有邊際時彼  
諸佛各各告其侍者曰諸族姓子且待須臾有菩薩  
名彌勒爲能仁如來所授決當速無上正真道成最  
正覺自問能仁如爾所怪佛爲一一分別義歸悉靜  
一心而俱聽之爾時佛告彌勒大士善哉阿逸仁者  
所問極大微妙優奧難量且聽且聽今我說之一切  
菩薩及諸會者普當堅固強猛力勢於無上意當知  
如來慧見無底諸大聖立境界無量禪定智慧所樂  
自恣莫能宣暢而剖判說方便興化不可限量時佛  
頌曰

諸族姓子 皆聽佛道 今吾所說  
慧柔和悅 若明達者 以爲美香  
如來之慧 不可思議 皆當強意  
普存堅固 各建立志 一心平等  
大聖難值 懿哀世間 今當聽受  
未曾有法 佛當建立 仁者諸黨  
一切無得 生狐疑心 導師所詔  
今無有異 其慧平等 安隱無特  
安住所療 法甚深奧 非心所思  
不可限量 今當講說 無極因緣

普共聽之

義何所趣

世尊歎已告彌勒曰班宣一切阿逸欲知此諸菩薩  
大士衆會無量不可思議各各從地而涌出者昔所  
不見皆集忍界吾始逮無上正真道成最正覺時歡  
悅斯等立不退轉使成大道教授化立族姓子開士  
大士之衆處于下方而於其中有所救護讀經諷誦  
思惟禪定專察其歸欣然悅豫樂無爲行諸族姓子  
志一恬憺不存遠近天上人間常應專修轉於法輪  
無爲無會好深神通法樂爲樂志願精進求于佛慧  
於時世尊而歎頌曰

今此無數

諸菩薩衆

不可思議

無能限量

造行億數

不可限劫

植積神足

博聞智慧

吾悉勸誘

於大聖道

今佛一切

皆授其決

斯諸菩薩

悉佛衆子

皆爲住此

於吾國土

悉捨棄離

諸所習地

一切皆處

閒居得度

此諸佛子

所行無爲

精進學習

奉遵上道

斯聰哲者

在於下方

今日故來

攝護國土

晝夜精進

無有逸慢

積累德行

分別佛道

常行勤修

立於慧力

一切意堅

而無限量

常志勇猛

思惟法典

普悉是吾

達清淨子

吾初逮成

爲佛道時

在於城中

若樹無著

則便講演

無上法輪

勸立其志

於尊佛道

今佛所說

至誠無漏

聞佛歎詠

皆當信之

開化發起

此諸羣英

從久曩來

立尊正道

不  
可  
謂

爾時彌勒大士聞佛說彼菩薩之衆億百千垓數難計會心用愕如怪未曾有白世尊曰云何大聖處迦羅衛釋氏王宮爲太子時委國重位衆女之娛出適道場坐于樹下得無上正真道成最正覺從來邇近甫四十年而所教化所度無量乃復爰發諸佛境界多所勸益所建權慧而不可議今是菩薩大會之衆悉皆如來之所開導部黨部黨衆多無量久修梵行植衆德本供養無數百千諸佛假使欲計成就以來劫數無限彌勒又啓欲引微喻譬如士夫年二十五首髮美黑姿體鮮澤被服粲麗端嚴殊妙常懷恐懼現百歲子其父謂言族姓子來爾則我子其百歲子

謂二十五歲人是我之父。父則察知口自說言是我  
之子。如是世尊。世俗之人所不信者。而令得信佛亦  
如是成佛未久。今有若干億百千數。久修梵行。長夜  
遵倚在於道慧勸進。現在無量之衆。曉了坐定。起立  
方便成大神通。聰明智慧。住于佛地。集佛慧義。於世  
希有。逮大聖力。世尊往古亦復教化于斯品類。誘導  
建立於菩薩地。當成無上正真之道。致諸正覺。悉行  
方便所作已辦。今我已受信逝。誠諦探暢。既往斷誓  
此義。其唯如來新學菩薩心懷猶豫。所不及知。如來  
勸樂當獲罪。豈善哉。世尊現說此義。其有狐疑於此。  
典者當來末世。諸學大乘。設使聞者。令不沈吟。於是  
彌勒大士於世尊前歎斯頌曰。

譬如有人 現生老子 能仁至聖  
棄國捐王 生於城中 而得佛道  
導師近爾 布屬渺少 今此諸樂  
不退轉子 無數億劫 行救大眾  
神足之力 住不可動 學智慧彊  
靡所不入 今來至此 在所開通  
如水蓮華 悉無所著 威神尊重

志超於世 立住恭肅 一切叉手  
諸菩薩衆 如是色像 爲如之何  
誰當信此 唯願大聖 加哀示現  
剖判分別 如審諦義 譬如有人  
而爲士夫 年旣幼少 髮美且黑  
其人年歲 二十有五 而乃產生  
百歲之男 養育澡洗 隨時衣食  
是我等父 而爲最勝 一切世間  
無有信者 幼稚年少 而生此子  
如是世尊 我等無央 無數菩薩  
而來集會 心彊智慧 又無所畏  
無數億劫 所學審諦 顯現端正  
其目通達 威神巍巍 志懷明哲  
而意勇猛 瞭了法律 為雄導師  
所見咨嗟 而竄山巖 靜行無爲  
如虛空界 悉無所著 禪定精進  
爲安住子 而心志求 於此佛道  
而何所入 當信此言 若於導師  
滅度之後 吾等於此 而無狐疑  
佛前目覩 則聞菩薩 於是之處

初學罔然 將無菩薩 歸於惡道

云何勸發

化此等倫

惟願世尊

覩縷解決

## 正法華經卷第七

### 音釋

懶候

懶力董切候郎計切

達

渠嬌

晉力置切

儻

他罵詈也

綢繆

綢直由切繆武彪切

謔

魚託切詰

謔

陟交

切以言

蟲豸

蟲直弓切豸池爾切

戢

側立切

覩

觀初

切近身

剖普后切

綜

子宋切

闕

闕缺規切

闕

容私視

衣也

剖剖析也

綜

理也

切

闕

闕私視

捷疾葉切

勘則力切

勦

許云切

慄

良質切

慄

恐瞿也

切問也

覩縷切

覩縷

切覩縷委曲也

休寧沙門如顯 性覺

海嶽泊全

本邑居

士程起家 程有功

丁煥祖共施刻此

正法華經第七卷

釋可震對南昌萬承明書進賢傳正忠刻

南唐庚戌春三月徑山寂照庵識

190

200

210

正法華經卷第八

西晉三藏竺法護譯

如來現壽品第十六

爾時世尊普告菩薩大衆三舉聲語諸族姓子悉當  
 信佛誠諦至教勿得猶豫時會菩薩彌勒大士其餘  
 之衆咸皆叉手白世尊曰惟願大聖分別說之我等  
 悉信如來所語諸菩薩白佛而亦至三於是世尊見  
 諸菩薩三稱勸助欲令佛說佛告諸菩薩曰諦聽諦  
 聽善思念之僉曰受教佛言族姓子如來建立如是  
 色像無極之力諸天龍神阿須倫世間人各自知之

各自念言能仁世尊從釋氏生棄國捐王行至江邊就于道場坐於樹下逮得無上正真道成最正覺又吾在昔從無數億百千那術垓劫以來已成至真等正覺矣譬有無數五百千億佛世界所有土地滿其中塵若有一士夫舉取一塵過于東方不可計會億百千垓諸佛國土乃著一塵如是次取越爾所國上復著一塵如斯之比類取無數五百千億佛界所有土地一切之塵一一取布著諸佛國悉令塵盡於諸族姓子意中云何有能計數此諸佛國思惟籌算寧知者乎彌勒大會諸菩薩衆悉白佛言無能計者天中天所以者何諸佛世界甚多無量不可思議非心所及假使一切聲聞緣覺處賢聖慧不能思惟知其數者唯有世尊大聖之慧乃能知耳餘無能及正使我等不退轉地諸菩薩黨尚不能知此諸佛世界不可限量難得邊際於時世尊告大眾曰今吾宣布語諸族姓子如彼士夫取無數五百千億佛界中塵舉一塵過于東方不可計會億百千垓諸佛國土乃著一塵如是次取越爾所國土復著一塵如此比類取無央數五百千億佛界所有土地一切之塵一一取布著諸佛國悉令塵盡吾逮無上正真之道成最正

覺已來其劫之限過於爾所塵數之劫諸族姓等見  
吾於此忍界講法復在他方億百千垓諸佛世界而  
示現皆悉稱吾爲如來至真等正覺錠光如來以諸  
伴黨若干之數而現滅度諸族姓子吾以善權方便  
演說經典現無央數種種瑞應又如來悉知一切羣  
萌往來進止諸源根本悉觀其心而隨示現各爲名  
號亦不滅度而說泥洹順諸衆生瑕穢善惡則爲解  
演若干種法諸族姓子見無數品心性各異所行不  
同本德淺薄多所破壞而不信樂故爲說言告諸比  
丘適度終始方今出家成平等覺從來未久甫乃逮  
得無上正真道成最正覺又如來成佛已來甚久故  
佛說言得佛未久所以者何欲化衆生故諸可說經  
皆已度脫所可講語自現其身爲一切故建示所行  
皆爲天人喜造罪福以故如來諸所講演皆實至誠  
非是虛妄如來皆見一切三界隨其化現亦無所行  
亦復不生亦不周旋亦不滅度不實不有亦不本無  
不知不爾亦無虛實亦不三界如來所行不見三處  
如來普觀一切諸法在於某處不失諸法一切所說  
至誠不虛衆生苦惱不可稱限行若干種志性各異  
思想諸念各各差別欲令衆生植衆德本故爲分別

說若干法又如來所當作者皆悉作之現適得佛成平等覺已來大久壽命無量常住不滅度又如來不必如初所說前過去世時行菩薩法以爲成就壽命爲限也又如來得佛以來復倍前喻億百千垓然後乃於泥洹而般泥洹所以者何爲衆生故而教化之故而亦示現行來久遠爲無德類離於福祚爲貧窶行著於愛欲纏諸見網而自覆蓋驅馳不定如來故爲現發忼忼疾獲之想不起懈怠難得之慮如來善權告諸比丘勤苦作行乃得佛道誠諦不虛以諸衆生從無量無央數億百千垓乃見如來以其忽忽所作不當故恇恇汲汲無有寧息故言言法難得值如來難遇聞見是以怪之難及興難遭想悲喜孜孜知佛希有便多發意樂在閒居而行精進適不見佛而懷渴仰見如來已歡喜稽首造衆德本其不滅度者教令滅度開化黎庶緣是如來出現說經而宣斯言誠諦不虛譬如士夫而爲醫術聰明智慧工巧難及曉練方藥知病輕重藥所應療多有兒子若十至百其醫遠行諸子皆在不解義理不別醫藥不識毒草被病困篤皆服毒藥毒藥發作悶眩反覆父從遠來子在城中腦發邪想父見諸子被病起想適見父來悉

皆喜悅白言父來安隱甚善我等自爲食信他言而  
服毒藥惟願大人救濟我命時父見子遭苦惱患宛  
轉在地尋勑從人持大藥來藥色甚好味美且香和  
合衆藥與諸兒子而告之曰速服上藥甘美芬馥假  
使諸子時服此藥其毒消滅病得瘳除身體安隱氣  
力康強諸子不隨顛倒懶悞想者見藥艷香嘗知其  
味尋便服之病卽得愈毒藥消滅子性戾者不肯服  
之服藥除者皆白父母與我等藥病悉瘳愈而蒙安  
隱其邪想自用不肯服也惡見藥色不喜香味父醫  
念言今我此子愚冥不解志性顛倒不肯服藥病不  
除愈或恐死亡寧可以權飲諸子藥則設方便欲令  
速服便告諸子今我年老羸劣無力如是當死汝輩  
孚起若吾命盡可以此藥多所療治服藥節度汝等  
當學假使狀病欲得安隱宜服斯藥教諸子已捨詣  
他國猶如終沒諸子聞父潛逝發喪啼哭悲哀不能  
自勝我等之父智慧聰明傲不服藥今者薨殮兄弟  
孤露思慕殷勤乃自剋責存不順教甫更遵崇父之  
餘業諦觀衆藥形色香味當自攻療不可輕戲尋便  
服藥深自消息病卽除愈時父見子服藥病愈便復  
還現佛語諸族姓子如彼醫者善權方便令子病愈

寧可誹謗彼醫所處爲不當乎諸菩薩白佛言不也世尊不也安住佛言吾從無數不可計限百千劫數發無上正真道意勤苦無量每行權便示現教化發起羣生其父醫者謂如來也諸兒子者謂五道生死人也父他行而不在者謂如來未出於世諸子入城服毒藥宛轉者謂在三界三毒所縛宛轉五道不能自濟父聞來還謂佛如來行大悲哀見三界人或流五趣不能自出故現世間廣說經法開化黎庶服藥病愈謂發無上正真道意立不退轉無所從生或得聲聞緣覺乘不至究竟視藥形色香味不肯服者謂六十二見諸墮邪者曰父年老留藥教子捨之去者謂諸黎庶疑受道教故現滅度留諸經法以教後世四輩弟子諷誦學問思佛功德發大道意或得羅漢或得緣覺佛見如是復還出世一切衆生皆是吾子諸族姓子如來行權非徒虛妄於是世尊欲重解義顯揚其事而歎頌曰

不可思議	億百千劫	欲得限量
莫能知數	得佛以來	至尊大聖
常講說法	未曾休懈	勸助發起
無數菩薩	皆建立之	於佛道慧

無數億劫 開導衆生 億千垓數  
不可思議 而爲示現 立于滅度  
以教化義 導利衆生 用權方便  
而現滅度 故爲衆人 演斯經典  
吾以自立 一切黎庶 分別羣萌  
於彼之義 其心顛倒 而不覺了  
欲立是等 佛宣暢說 設見於佛  
滅度之後 以若干物 而用供養  
又覩吾沒 愁悒憂感 若復見佛  
歡喜踊躍 假使質直 說至誠言  
衆生之類 將棄身體 然後如來  
合集衆音 能自示現 顯大佛道  
而於後世 分別此語 吾在于斯  
不爲滅度 比丘欲知 及與異人  
數數堪忍 現壽於世 佛權方便  
眷屬圍繞 因而宣揚 於尊佛道  
諸賢得聞 出世間難 又復導師  
餘國滅度 觀察衆生 愁憂懊惱  
倉卒不現 其身相好 望想飢虛  
欲得見佛 然後乃爲 分別經典

不可思議 億百千劫 吾常建立  
如此像義 佛來至於 靈鷲之山  
自然牀座 無量垓數 設使衆生  
見是世界 大火災變 劫燒天地  
當此之時 吾此佛土 具足微妙  
柔軟安雅 歌舞戲笑 無量安隱  
講堂精舍 樓閣室宅 校飾莊嚴  
皆以七寶 藥草樹木 華實茂好  
自然雨華 心華衆色 以散於佛  
及弟子上 諸人皆坐 館室雷震  
或復好樂 發道意者 吾之國土  
建立常然 餘人有見 劫如燒盡  
覩其世界 火甚可畏 本以權便  
示現斯變 如來咨嗟 無央數億  
佛之法尊 其爲若茲 衆生品類  
不肯聽聞 然而喜造 殪釁之罪  
假使人民 柔軟中和 其時佛興  
出于人間 已見世尊 經法所詔  
則爲顯揚 清淨義理 佛未爲人  
分別戒誨 說斯所造 往返之事

卷八

十八

假使如來 久久而現 然後乃爲  
 講是經典 吾智慧力 聖達光明  
 如是所見 不爲薄少 前世所行  
 無量劫數 慈心之品 平坦無求  
 智慧明者 無所狐疑 棄捐猶豫  
 勿懷結滯 所當列露 未曾班宣  
 佛今散告 無復餘義 如醫所建  
 善權方便 開闡分別 示子方術  
 現衰老死 其身續存 神變音聲  
 不終不始 受諸等友 而自由用  
 世吼療治 衆生之病 開導癡騃  
 令離愚冥 而現泥洹 亦不減度  
 何故殷勤 欲得現已 人常闇弊  
 使意信樂 以放逸故 墜墮三處  
 其心踊躍 欲令覺了 如來所詔  
 常以知時 爲其衆生 而行智慧  
 以何方便 而說道法 何因令獲  
 於佛經處

世尊說是如來壽限時則無央數不可思議衆生皆  
 獲利義解脫至道

例福事品第十七

爾爾世尊告彌勒大士阿逸欲知今佛說此如來壽限經典之時六十八億那術百千江河沙等諸菩薩逮不起法忍二千江河沙菩薩大士皆得總持如一千佛世界塵數菩薩大士逮得無礙辯才總持復有如千佛世界塵數菩薩大士聞是經典轉不退轉法輪復有如中千佛世界塵數菩薩逮得無垢大聖分別而轉法輪復有如佛小千世界塵數菩薩聞是經典逮得八生住當成無上正真道復有如四天下塵數菩薩大士聞此法已得一生補處當成正覺復有如八佛世界塵數黎庶聞是經典悉發無上正真道佛適說斯諸菩薩大士尋則建立應時虛空雨諸天華意華及大意華紛紛如雪以散無數百千世界億百千垓諸佛世尊故來垂恩坐師子牀七寶樹下及能仁大聖上其無央數不可稱限諸滅度佛并多寶佛身地卽大動及雨一切諸菩薩上及雨四種栴檀雜香蜜香一切諸香從虛空墮虛空之中發大雷音深柔軟音自然妙響千萬瓔珞若干奇珍明月珠寶如意之珠諸珠瓔珞皆於空中垂下如旛無數香爐

在於空中自然香出復有無數百千寶蓋自然來至  
一一寶蓋各各普覆一一佛上上至梵天諸菩薩衆  
在於空中執蓋而侍億百千垓諸如來左右於是彌  
勒而讚頌曰

安住今聞 未曾有法 本來未嘗  
見此光明 廣大極遠 不可限量  
如向所覩 無能思議 今日我已  
所聞經典 而觀安住 現分別說  
建立衆生 億百千數 大聖導師  
於世殊特 不退轉輪 住於佛道  
或有得立 執攬微密 或有得處  
無限之義 億百千數 總持之要  
欲有限量 及思惟者 有所建立  
并越度生 或有二住 及八住者  
當得佛道 所度無量 或有學者  
超越于四 或有至三 或於二住  
緣從導師 聞是經典 當得佛道  
顯第一義 或有建立 一生補處  
成諸通慧 遊於諸有 聽省於斯  
大聖所說 有成果證 無有諸漏

猶如入佛 國土諸塵 其欲數者  
限量如此 若有黎庶 億數聽經  
聞是皆發 殊勝道意 無極大仙  
造得若斯 分別演說 立真諦地  
無量諸身 不得稱限 譬如虛空  
無有邊際 諸天所雨 無數億華  
不可計量 天子億千 帝釋梵天  
如江河沙 其來至此 無數億千  
雜香妙香 供養安住 蜜香上香  
而以散佛 專已作行 猶如飛鳥  
普來供養 安住如來 上虛空中  
自然雷震 柔軟音聲 暢深妙法  
億百千天 俱共歌頌 明月珠寶  
自然下降 自然諸香 而爲芬薰  
七寶寶瓶 億百千垓 羅列虛空  
如鴈飛行 供養大聖 威神之尊  
諸蓋億垓 不可限量 廣大周帀  
七寶嚴飾 聰明智慧 諸菩薩執  
身形高長 上至梵天 微妙殊好  
威光巍巍 罂旛綺麗 供養佛上

咨嗟衆聖

億千讚頌

心懷踊躍

敬安住名

所在向方

尊未曾有

見若干種

諸異導師

普而示現

壽命之限

今此衆生

悉歡喜悅

其義廣普

至千十方

導師音聲

靡不達至

飽滿衆生

億百千數

曉了道意

具足莊嚴

爾時世尊告彌勒曰其聞如來所現壽命所說經法發意頃生快心篤信者所得功德不可稱量譬若族姓子族姓女欲得無上正真道奉行布施持戒忍辱精進一心五度無極八億百千劫不如族姓子族姓女聞斯如來壽命之限發意之頃歡喜信樂而不狐疑若干種行歸一道者欲知功德勝于八億百千劫行五度無極百倍千倍萬倍億倍巨億萬倍福不可譬無以爲喻佛言阿逸族姓子族姓女聞此經法一發意頃歡喜信者則爲堅住無上正真道成最正覺佛時頌曰

若一切遵修 行五度無極 志慕求斯慧  
意存佛上道 設於億千劫 具足八前劫  
而布施諸佛 數數及聲聞 供養諸緣覺

菩薩億千垓 奉進諸飲食 衣服牀臥具  
榻席及屋室 皆以栴檀香 圓觀平等足  
爲施經行處 如是布施已 若干種無數  
於億百劫中 用求尊佛道 又復護禁戒  
信喜稽首佛 明立無所犯 猶得佛慧故  
次復順忍辱 住於調定地 志尊無所恨  
忍無數罵詈 設覩卒暴者 住慢而自大  
悉能忍彼等 以求佛道故 常殷勤精進  
寬弘志堅固 意念餘思想 遊至億佛土  
若處於閒居 欲棄于睡眠 其人億劫行  
常習於經行 欲比無等倫 億千劫禪定  
加復八千億 而行專一心 志願上佛道  
欲得諸通慧 具足定無極 一切禪寂然  
諸所造福德 合會而集聚 億百千劫中  
如前所咨嗟 若男子女人 其聞佛壽限  
一時歡喜信 此得爲最上 當棄捐猶豫  
諸著思想事 信樂大法義 其福爲若斯  
若菩薩求道 遵奉億劫載 是聞不爲聞  
聽佛壽無量 當以頂稽首 如是像類人  
然後將來世 度脫億數人 如能仁世尊

釋師子大仁 坐於佛樹下 而演師子吼

吾今所以來 衆生所恭敬 處於佛道場

說壽亦當然 志性悉具足 其人博聞持

所說諦化人 則無有狐疑

佛復告阿逸其有聞說如來壽經者人中受持分別曉了其得福德不可稱限卽過於彼若干億劫奉五度無極上至于佛慧所當示現所當奉行復次其聞是經卽持書寫已載於竹帛供養奉事散華燒香擣香雜香繪蓋幢旛麻油燈香油燈醍醐燈其福過彼甚多無數當致如來慧見之事猶如阿逸彼族姓子弟得聞斯如來壽限經其心質直歡喜信者以是情性當觀此相卽當知之已見如來在靈鷲山說是經時與諸菩薩眷屬圍繞聲聞之衆於斯佛土三千大千世界之中平等忍辱地爲紺瑠璃紫磨金色八重交道七寶行樹若干種億屋宅居室諸菩薩衆於其中止阿逸欲知彼其人心常能質直安悅信者以是色像知其相行曾見佛會又如來尊悉見彼人心所信樂如來滅後族姓子女聞此經卷亦不誹謗勸樂受持則爲如來所見擁護其族姓子超於興起爲佛塔廟起於建立精舍屋室超於瞻視比丘疾病而給

經

正法華經卷八

三五

醫藥供養之具所以者何是等族姓子以爲具足興立塔廟起七寶寺上至梵天悉爲供養一切舍利其佛塔寺周回無限普盡地際懸衆寶鈴無上之藏諸舍利廟供養華香雜香擣香寶蓋幢旛妓樂歌頌若干種香天土世間所有珍奇天華天香及天妓樂空中雷震暢發洪音鍾磬大鼓箜篌樂器簫瑟琴箏銚鋟若干柔軟哀聲歌舞節奏調合克諧無數億百千劫供養奉侍諸度無極皆悉克備佛滅度後其有得聞此經典者持讀書寫若分別說福勝無量修慈愍止其中園觀華實明月珠寶經行諸坐飲食供養病哀廣普受持講堂精舍牀榻錦繡敷具令比丘衆頓妙顯好上至梵天旛蓋校飾勸助福故稍稍轉具而減除罪靡不粲麗五體精進而在閒居積功累德無數巨億百千劫中稱揚其名一切莊嚴威神巍巍皆悉弘普於是世尊而歎頌曰

若起七寶塔 上至于梵天 華香及妓樂  
旛蓋悉供養 諸牀臥之具 飲食細供饌  
病瘦給醫藥 寶牀若干品 入微妙莊嚴  
上至于梵天 普校飾佛土 勸助兼備足

五事勤閒居 威興多億數 一切人所樂  
微妙施最勝 供事悉具足 鮮淨華幢旛  
以此爲衣服 數數如雷震 衆妓柔軟悲  
以供養舍利 香油爲然燈 分布圍周帀  
其有持此經 於亂世講說 以爲具足辯  
斯若干供養 無數億屋室 皆以栴檀作  
講堂三十二 極高無有極 悉敷諸坐具  
隨所欲飲食 如是億百千 供養妙餚饌  
圓觀及經行 華布徧其地 覆蓋具無量  
目前辨斯以 如來滅度後 若讀書寫經  
歡喜而信樂 其德福無量 超餘福之上  
彩畫若干像 用供養衆僧 其持是經者  
其有人書寫 淨潔令安諦 當供養經卷  
華香雜芬薰 常當然燈火 香油爲錠燎  
所生輒歡喜 數上思夷華 其人奉經卷  
供養當如是 得福甚衆多 其限不可量  
譬如虛空界 其限不可得 十方之無量  
其福比如是 何況能復加 常施於安隱  
奉戒行禪思 而在宴坐行 無瞋不惡口  
恭敬立思惟 比丘尼常當 謙恪不自大

正法華經卷八  
150  
1 2 3 4 5 6 7 8 9 200 1 2 3 4 5 6 7 8 9 200  
智慧而晝明 問智者不恐 次第順分別  
意懷愍得佛 假使如是像 持殊勝經者  
其人功德品 不可得限量 設使人見此  
如是像法師 當持此經卷 奉敬加供養  
假使有人 以天華香 用天寶蓋  
而以覆陰 當以首頂 禮其人足  
常想念之 如來最勝 爾時見者  
作是思惟 如當求索 樹王之下  
當覺成佛 所在供養 爲饒利益  
諸天世間 假使住立 若處安坐  
所在經行 其德如是 臥在牀榻  
若著衣服 而常講演 斯如來經  
於時士夫 人知於此經卷 與若干種  
顯諦微妙 世尊導師 於說至誠  
以無數珍 舍中而供養者 如吾所歎  
所有土地 則爲佛身 於彼經行  
佛聖於中 而坐座上 覺了所在  
遊居之處

勸助品第十八

爾時彌勒大士白佛言其有聞是所說經典得何福

祐以偈頌曰

大雄若滅度

其有聞是經

省之卽勤助

爲得何福祐

於是世尊告彌勒曰如來滅後其有聞是所說經者若比丘比丘尼清信士清信女男子女人大小眷屬已勸助於衆會中宜轉爲人說若在室宅若在露處若在閒居郡國縣邑所當作爲如所聞經如所受得任彼力勢爲人解說若爲父母宗室歎詠聞大士言亦讚代喜所可聞知展轉相傳不見法師威容色貌若轉學者代之勸助以是因緣所興方便使五道人有五蓋者通得相見各以所聞轉相勸化聽我所說勸助之福所聞法師經法功德族姓子女無數千載四域天下六趣羣生未盡羅網有色無色有想無想不有想不無想有足無足兩足四足多足諸天人民或有一人欲求功德隨此衆生所欲樂喜已所愛重極上微妙供養之具滿闍浮利爲一一人廣大布施隨其所欲屋宅金銀水精瑠璃珊瑚琥珀碑碣碼礧象馬車牛衆寶合成無央數歲恣所求索應意備足供養飲食無所乏少中自念言年朽力弊心用疲殆豈可化入如來法律以佛所詔用誨衆生尋如所

念以律檢非道之典教黎庶一時俱履道跡往來不  
還無著德證諸漏已盡禪定具足威神巍巍得入解  
門一心不亂於阿逸意云何彼時士夫所建福施有  
能思惟限量者乎彌勒答曰甚多甚多不可訾計乃  
能安慰無量衆生供足所乏加復立志於無著證佛  
告阿逸今故語人宣布四遠如彼士夫興大布施供  
給無數四域羣生立無著證佛言其聞是經一句一  
頌勸助代喜福過彼人所布施上一句一頌勸助功  
德不可稱限百倍千倍萬億倍巨億萬倍億百千劫  
不可計量無以爲喻何況自見於此經典耳聽代喜  
德難計會假使有人欲聞斯經若入精舍所至到處  
若入縣邑若住若坐一時得聞此經法者若再反聞  
所在專精現在生處所獲福祐常得自然無數珍寶  
宮殿精舍牀榻坐具象馬車乘安雅無量說經進止  
若住若坐息心天王就擁護之不遭罪患釋梵四天  
翼佐營衛轉輪聖王近師子座設族姓子唱言有經  
名正法華真可奉敬宜共聽受更相請命若辭泥雨  
設懈不行若得斯須暫聽聞者則解罪福善惡報應  
便得德本當獲總持與諸菩薩世世相隨在在所生  
聰明智慧億百千世體常香潔不墮惡趣不與賊害

兵刃共會無有邪心面色光潤生賢善家見者歡喜  
無憎惡者不盲不聾鼻不偏戾亦不塞齶不瘡不痘  
不禿不跛不偃不躑不愚不癡不短不長不柔不剛  
不白不黑面不萎黃身體完具姿顏端正色如桃華  
人所愛敬心性仁賢口言辯慧疾速禪定如來法教  
欲觀諸佛如願卽見世尊正覺當學此經佛語阿逸  
且觀其德若有一人一反聞名勸助代喜乃獲此福  
何況有人專精聽受供養思惟而復具足爲人說者  
爾時世尊而歎頌曰

最後若有 值是經卷 假使逮得

一頌之說 聽採其義 心喜勸助

其人功德 不可限量 設令有人

獨能施與 常給衆生 億千垓數

如佛向者 所現譬喻 令無數歲

皆得飽滿 於時士夫 觀面色變

頭白齒落 年老朽耄 斯羣生類

將無終沒 我欲教化 使人道法

其人最後 以法教喻 爲分別演

無爲之地 一切五道 猶如芭蕉

速令逮及 於滅度事 一切衆庶

皆聽受經 而從士夫 親近諮詢  
制伏其心 悉使無漏 一時之頃  
得無著證 若聞一偈 代是勸助  
一偈功德 出彼無量 各各所施  
一一分別 一頌之德 難計難限  
倉卒得聞 講一頌者 莫能限量  
勲無涯底 其人得福 無數如是  
何況現在 面目啓受 假使有人  
來至衆會 一反聞經 歡喜踊躍  
從億百千 諸垓劫數 是法難值  
亦難曉了 若令有人 誰及彼士  
須臾得聞 於斯經卷 且當聽是  
所獲果報 在在所由 無有大病  
世世所生 舌無有患 牙齒堅固  
未曾墮落 初不凶害 除諸危殆  
及邪反戾 父母賢良 所立巧便  
壽命常長 未曾生盲 目亦不冥  
鼻耳殊好 無有缺減 舜舌雅妙  
面常鮮潔 常爲衆人 所見愛敬  
口氣芬馥 無有臭穢 形體常香

如青蓮華

其薰流布

無所不周

若居堂室

行至精舍

所到之處

有聽斯經

須臾之間

逮知聞者

熙怡喜踊

在邊啓受

其人儀體

獲致安隱

殊妙車馬

則用聘迎

若復乘于

賢善象車

所在遊得

若干種寶

常復獲逮

上妙瓔珞

數百千人

悉共發意

往造其所

所說法果

則爲講斯

清淨教誨

清淨法故

所建鮮明

得爲天帝

梵天牀座

速疾逮至

轉輪聖王

長處衆會

敷演經義

## 正法華經卷第八

校譌

第四紙第六行

立北藏悞作從南改正

第十七紙第一行

悞

作日從南改正

音釋

寢

其知切貧

忻

並五亂切

忻

並卽移切攷汲汲也

興

許救切

興

以

瘳

丑鳩切

瘳

瘳呼肱

瘳

瘳呼肱

瘳

瘳呼肱

瘳

瘳呼肱

瘳

瘳呼肱

計切薨殮並死也

懊

鳥皓切

懊

懊

懊

懊

懊

懊

懊

懊

懊

懊

懊

懊

懊

懊

切量塞驛  
也  
烏貢切鼻塞病也  
跛偏廢也  
偃於爲切焉  
也  
蹙彼戰切足  
也  
不能行也  
萎也枯也  
聘匹正切  
訪問也

休寧沙門如顯性覺海藏泊全本邑居  
士程起家程有功丁煥祖共施刻此  
正法華經第八卷  
安城府廩對南昌萬承明書進賢傳正忠  
黃信庚戌春三月徑山寂照庵識

### 正法華經卷第九

西晉三藏竺法護譯

### 歎法師品第十九

爾時世尊告常應時菩薩大士若族姓子族姓女受是經典持讀書寫當得十眼功德之本八百名稱千二百耳根千二百鼻根千二百舌根千二百身行千二百意淨是爲無數百千品德則能嚴淨六根功祚他人若令眼根清淨而以肉眼覩諸所有滿三千大千世界諸味石蜜叢樹下至無可大地獄中上至十三天一切普見悉能攝取故曰肉眼若有衆庶生

其中者皆悉見之咸曉了知罪福所趣於時世尊而歎頌曰

其持此經卷 勇猛處衆會 所說不怯弱

且聽斯名德 八百諸名稱 清淨目明朗

若已離諸垢 其眼所覺普 彼則以肉眼

而從父母生 觀諸佛世界 普見超神仙

諸山須彌山 又觀于鐵圍 幷諸陵丘阜

而復察大海 默證住一處 普瞻靡不達

下至無可獄 肉眼爲若斯 尚未獲天眼

亦不覩了知 肉眼之境界 根且覺輕便

佛復告常應時菩薩若族姓子族姓女說是經典若

爲異類聲聞乘說者則便逮得千二百耳名稱聞三

千大千世界周而下至無可大地獄上至三十三天

超外神仙所謂聞者象聲馬聲牛聲妓樂聲車聲啼

哭聲愁歎聲鼓聲鍾聲歌舞聲儻聲戲笑聲男聲女聲

幼童聲童女聲風聲奇妙聲正法聲非法聲樂聲苦

聲力聲志性聲柔聲麤聲天聲龍聲鬼神捷沓和阿

須倫迦留羅真陀羅摩休勒聲火聲水聲地中聲比

丘聲聲聞聲菩薩聲如來聲三千大千世界所有音

聲內外通徹一切清淨以肉耳根悉聞衆生所說音

聲尚未得天耳而悉普聞曉了萌類諸聲亦不思惟  
觀察黎庶本末所由又耳悉聞亦不求索一切音聲  
又而順聞巍巍如是常應時菩薩大士未得天耳而  
耳所聽乃如斯也佛說此已欲重解義從後頌曰

鮮潔總攝

若干品類

清淨之耳

千有二百

於是世界

以是聽省

聞其音聲

無有遺餘

有六情者

則而聽聞

車牛諸乘

象馬音聲

拍手擊鼓

悲好音樂

銕鉞捎拂

亦復如是

妓樂柔和

其音殊好

雖在於彼

無所染著

聞無數人

諸可講說

彼人等倫

所當分別

皆聞諸天

天耳所聽

常而降伏

甘美柔和

男子女人

諸啼哭聲

童男童女

所可作爲

哀鸞之音

及赤嘴鴟

鳩鵠鴛鴦

及與鸚鵡

其有棲跱

於山林者

悉得聽聞

斯類音聲

地獄之中

勤苦毒痛

悲哀囁呼

所酷苦響

思想飯食

所至求索

興作發起

所出音聲

諸阿須倫 居在于海 諸響暢逸  
而各各異 於時法師 停住於此  
有語言者 尋時普聞 畜生餓鬼  
勞飢渴聲 各各講說 或鳴或吼  
彼時法師 默如立斯 則得聽聞  
若干音聲 其梵天上 所居諸天  
光音天上 善究竟天 及餘奇特  
各各異聲 法師普得 悉聞此響  
在安住世 而出捨家 他人志性  
諷誦所行 分別現說 諸比丘衆  
法師悉聞 是等說經 諸菩薩衆  
處斯境界 所可諷誦 爲他人說  
可集結義 以爲經典 悉得普聞  
若干種音 其佛世尊 爲人御法  
而爲衆生 說無數經 獨在樹下  
悉得聽聞 因其菩薩 能持是經  
一切三千 是佛國土 無數衆生  
音聲暢逸 若在室中 或復處外  
所言麤細 悉普聆採 悉聞一切  
羣萌音響 於諸音聲 亦無所著

處處悉知

他人表裏

其耳清淨

聽徹如是

斯人尚未

得天耳光

適覩因緣

尋能卽聽

於時法師

功德如是

學斯經卷

名稱若茲

佛復告常應時菩薩若族姓子族姓女有持是經卷分別說者若復諷誦誦書著竹帛得八百鼻功德諸根堅固鼻根清淨以是鼻根三千大千世界所有諸香皆得普聞華香柔軟香須曼香生香傅飾鬚香思夷華香青蓮紅蓮黃蓮白蓮若干樹木菓實熏陸香蘇合香華香栴檀香木欝香青木欝香種種衆香百千殊品處處生者諸質朴香人所艱香男子女人童男童女香皆自聞服已身之香象馬六畜飛禽走獸香諸樹木香諸樹木間舍血品類香諸妖魅香至誠香天上香比陀美香晝度樹香意香大意香柔軟香大柔軟香諸天香天宮香帝釋身香知所生處於講堂上鼓樂弦歌所當修設諸天法則爲忉利天諸天說法從地涌出自然生者歌戲利義天王女香童男女香以是因緣假生梵天諸天子等諸大天人大梵身香其香各各從身流出諸天雜香無數百千其名各異聲聞緣覺菩薩大士如來遊居所開化香其法師

者於此間住所去殊遠不到其前亦不近邊不往就  
艸悉聞彼香不愛不求亦不思念亦不笮香而艸知  
氣以一心住在於衆會悉分別說如是諸香心亦不  
著無所慕求於是世尊而歎頌曰

其人鼻根	清淨如是	若干種香
所聞甚多	於是世界	一切所有
諸所可生	香香甚好	又有諸形
華植之香	栴檀諸香	種種異品
其諸華實	各各異類	微妙好熏
衆木檼香	男女子人	童子女類
其心頓處	各各異品	人間所生
諸香參差	在在滋殖	青蒼雜遷
又知大國	轉輪聖王	所據柔仁
自由力強	於彼所有	羅縷字名
衆衆異香	皆分別之	財物珍寶
若干甚多	藏去著之	於何所地
有玉女寶	及餘珍異	時彼菩薩
悉曉了香	是等體著	所有瓔珞
珠環莊嚴	衣服端正	或時在座
若寢牀臥	以香塗身	菩薩悉知

歌戲娛樂 一切神足 明詰智者  
鼻力悉聞 若有奉持 此經善訓  
以快妙香 及麻油香 若干種類  
及華實香 所在安住 又臭悉知  
其於某處 有此衆香 悉能分別  
若干種者 而於山巖 中間所有  
無央數種 梅檀華香 又復人民  
諸所有香 居止于彼 一切了知  
若轉輪王 所可愛喜 或有潛處  
在于海中 若於地穴 所生蟲蛾  
明者皆練 此輩衆香 知阿須倫  
妃后子女 幷及臣民 皆分別識  
阿須倫王 歌舞戲笑 其鼻悉艱  
如是果報 若於曠野 四徼道中  
多有師子 虎狼龍象 水牛眷屬  
諸所種類 特牛牸牛 悉能知之  
若有女人 隨其喜樂 假使童子  
及童女衆 有若懷軀 身體疲極  
以香分別 腹中男女 復自知識  
身所從來 又亦曉了 義法科律

探覩其人 安隱苦樂 童男力勢  
福應所獲 男女所願 衆多悉知  
而覩貌別 諸所願香 已自可意  
如是無盡 又復貌別 身寂然者  
其自處在 地中諸藏 財物珍寶  
金銀雜色 柔軟珊瑚 形如紫金  
所止頓處 悉貌知之 諸貫瓔珞  
明月珠寶 世間載有 人所不及  
用鼻悉貌 知其好醜 行來進止  
別其善惡 諸天在上 虛空之中  
意華諸華 柔軟音華 衆會之中  
所有諸華 以鼻勢力 住此悉聞  
其諸天人 所有宮殿 上妙下極  
及中間宮 種種之品 如斯色像  
於此住立 鼻力貌之 又復分別  
遊觀之園 諸天之法 衆明寂然  
亦復曉了 尊妙宮殿 諸天子等  
所遊戲處 於是建立 悉貌天香  
以香分別 諸天子黨 住於何法  
興何等行 所在遊居 悉聞其香

諸天玉女 所畜華菓 諸寶瓔珞  
周旋娛樂 於時菩薩 悉識其香  
三十三天 至第一天 諸天大梵  
所遊宮殿 彼以鼻覥 悉能知之  
住已不住 皆能曉了 諸所遠近  
無不開達 終沒若生 前世宿命  
以鼻覥之 知斯本末 其有菩薩  
持是經卷 若有比丘 順安住教  
常修精進 靜住經行 若以至誠  
諷誦解說 其彼菩薩 皆悉知之  
亦別聲聞 最勝之子 常在樹下  
一身獨處 處於某處 悉能分別  
有某比丘 其明詰者 承臭悉覩  
所在之處 其有菩薩 意堅禪定  
常自娛樂 諷誦講說 復爲他人  
講演解法 於時菩薩 以香覺了  
安住大人 遊所在方 懈怠行慈  
分別說法 在其中坐 弟子圍繞  
以香識了 法王所在 假使衆生  
得聞經法 以得稟受 心懷踊躍

時菩薩住

於此悉見

安住衆會

一切所在

菩薩勢力

如是色像

尚未逮得

天人之鼻

自然得是

本之瑞應

諸天之鼻

無有諸漏

佛復告族姓子其有持是經典讀說書寫當獲奇異舌根千二百功德舌根具足分別諸味若得甘美變爲天上自然飲食設服酢澁鹹苦化成天饌滋味無量若入衆會講授法要悉庶欣載欽仰典則若入諍怒德音柔軟談義辯慧清白知節慈愍通徹衆人歡和感味餘響其從聞經言論美妙天人往造釋梵四王清淨天身諸天玉女思僥往見天子龍神龍神妃后阿須倫阿須倫妃后迦留羅迦留羅妃后真陀羅真陀羅妃后摩休勒摩休勒妃后犍沓和犍沓和妃后閻又鬼神婦女比耶反足鬼神婦女悉欲往觀稽首作禮聽受經戒問訊義歸比丘比丘尼清信士清信女國王太子大臣羣僚大力豪勢轉輪聖帝尊重巍巍七寶具足太子眷屬玉女采女又異梵志君子居士州城郡國縣邑營從悉欲往觀思盡形壽稽首歸命供養奉侍聽受經法言誨和淑猶如世尊如來所歎面見思察逮佛明慧深妙之要曉了如此自然

而聞又知世尊所向方面坐說法時於是世尊而歎	頌曰	
其人舌根	則悉柔軟	分別諸味
簡練好醜	自然甘美	如天飲食
若干種味	次第而至	音聲殊妙
語言和雅	聽受奇異	意歡喜悅
在衆會者	莫不欽敬	又當演出
深奧音響	其有聽聞	所說經法
觀察報應	清淨億千	卽生歡喜
曉了尊上	供奉經卷	不可計量
諸天龍神	蚊阿須倫	常懷欽敬
欲得見之	謙肅恭遜	詰受經典
其人名德	獲致如是	於是世界
發意之頃	皆以音聲	能偏告之
其響柔軟	微妙殊特	深邃儒雅
而有限節	諸天豪尊	轉輪聖帝
欲得供養	普往至所	皇后玉女
悉俱叉手	而常元元	聽稟經典
諸所鬼神	善共宗重	天犍沓和
及諸營從	反足女鬼	及諸男子

普悉恭敬 皆造奉侍 自在尊豪

梵天之王

大神妙天

及諸天子

天帝梵尊

天子枝黨

無數玉女

悉詣其所

世間有佛

聖明導師

聲聞弟子

悉聆妙響

見所在處

僉然護人

察所講法

悉用欣然

佛復告族姓子菩薩大士若聞是經持讀書寫者逮得身行八百功德肌色光澤勇猛享饋猶如瑠璃淨妙無垢所當作爲人民欽效容止可宗進退致益彼已無易三千大千世界衆生稽首爲禮普佛國土羣萌好醜鮮色惡色生趣善惡鐵圍大鐵圍小山大山人所居處下至無可大地獄中上至三十三天自以威德普悉見之於此世界聲聞緣覺菩薩如來所可遊居講說經法以已威光都皆觀之所以者何身行清淨之所致也於時世尊而歎頌曰

彼人已身

所行清淨

譬如瑠璃

而無瑕玼

爲一切人

所見愛敬

其有持此

微妙經卷

猶如明鏡

見其面像

見世形類

亦復如是

目覩本末

及見他人

其身清淨

如須彌山 於斯世界 所有衆生  
諸天人民 蝗阿須倫 地獄餓鬼  
及諸畜生 悉見身體 及面顏容  
諸天所有 宮殿館室 土山石山  
及諸鐵圍 雪山須彌 及諸太山  
悉得覩見 其所在處 以大威聖  
瞻見諸佛 一切聲聞 及佛弟子  
若有菩薩 獨在屏處 所說經法  
悉能知之 其身清淨 亦復如是  
悉覩見于 一切世間 以俗之身  
覺了如茲 斯人尚未 獲成聖道  
佛復告族姓子菩薩大士如來滅度後若持斯經諷  
誦解說得千二百意根清淨德其人則以清淨意根  
靡不貫暢聞一頌者所究彌廣多所達了以弘覺了  
便能一月講說經法四月一年綜練所歷憶念不忘  
不失其緒三千大千世界諸六趣生皆知其心所念  
善惡如應不應中爲沙門聖非聖者普見不應意志  
清淨不復思惟自然分別說法義趣言皆至誠有至  
講者皆亦承說如來所詔一切割暫住古最勝經卷

於時世尊而歎頌曰

其人意根

清淨皎潔

光徹鮮明

見心所念

猶是之故

聖智曉若干品

瑕穢卑賤

好惡中間

若聞一頌

能奉持者

解無央數

明詰義理

一月四月

若至一年

所說善惡不違

不違至誠

於斯世界

中間所苞

若有羣萌

百千種種

品類其入諸天人民

及阿須倫

伎神異類

及諸畜生

六道之中

所有黎元

是等思想

若干種念

持是經者

各各異意

一時之間

悉覩知之

諸佛大聖

百功德相

一切悉爲

世間說法

登時所講

普得聽聞

所學經卷

卽能受誦

前世更歷

有常所演

長夜所講

當綜解之

無所畏憚

經典之要

得衆會中

其有持經

部分光揚

卒未遭值

衆想之患

根黨羣從

悉爲良賢

意根明達

亦復如是

菩薩所住

未曾有地

普爲衆生

分別說經

其能受持

安住正法

巧便憶宜

常被經慢品第二十

中無他異解

無他異解

於是佛告得大勢菩薩是故當知其有比丘比丘尼清信士清信女持斯經典假使四部罵詈誹謗出麤穢辭呵制止之罪不可限設復有人聞是經卷受持諷誦爲他人說廣解其義獲上妙福如斯儕類佛所詰嗟眼耳鼻口身意清淨而無蔽礙又告得大勢乃去往古久遠世時不可稱限廣遠無量不可議劫有佛號寂趣音王如來至真等正覺明行成爲善逝世間解無上士道法御天人師爲佛衆祐劫名離大財世界曰大柱佛語得大勢寂趣音王如來普爲諸天自境界人講經化導興聲聞乘演四聖諦度老病死使近泥洹解十二緣所由從起爲諸菩薩講六度無極使至無上正真道現如來慧所行牽連佛壽四江河沙億百千垓劫佛滅度後正法住立如一闡浮提億百千垓塵數劫其像法立如四天下億百千垓塵數劫又語得大勢其佛滅度後像法沒盡次復有佛續號寂趣音王展轉相承二十億千如來至真等正

覺明行成爲善逝世間解無上士道法御天人師時此諸佛次第滅度正法沒已像法次盡彼世比丘憍慢自大越背法詔有一比丘名曰常被輕慢爲菩薩學何故名之常被輕慢其開士見比丘比丘尼清信士清信女無謂之曰諸賢無得憍慢自高所以者何諸賢志趣當尚菩薩如來至真等正覺以是方便順所緣義爲諸比丘講菩薩行不受所誨不肯諷誦遙見四部仍謂之曰我身終不輕慢諸賢仁普當學菩薩高行得至如來至真等正覺佛語得大勢爾時四部得聞此言咸興恚怒毀訾罵詈此一比丘不問吾等不見人心反自貢高云見人心授我等決當成無上至真等正覺人所不欲非常之事而爲人說又語得大勢若一比丘行值大雨蒙佛威神如被覆蓋身不潰溺雖見罵詈心不恚恨面色不變若聞其言增不喜者以瓦石擲續遙舉聲而教之曰勿行輕慢修忍辱心發菩提意所以者何爾時比丘比丘尼清信士清信女貢高自大數數聞見大士教曰吾心常謙不輕諸賢雖見罵辱心無增減彼等四輩因共名之常被輕慢斯一大士臨欲壽終得聞寂趣音王如來講正法華經二十頌本深妙之義億百千事大士臨

終涌在虛空唱揚大音歎斯經典而告之曰仁當受經亦當逮得如前淨眼耳鼻口身意亦清淨已獲斯淨更卽增益二十億垓壽逮得定意復爲衆人講是經典前時四部聞其所說而毀訾之名此大士爲常被輕慢逮自大者見此大士微妙神力辯才慧力善權道力皆來歸伏敬崇爲友聽聞經法是輩等類餘不可計無數億人便立無上正真道意時彼大士壽沒之後便值二十百千億如來正真此諸世尊皆爲講說正法華經稍稍進前以是德本復更值見二十億百千如來皆同一號號雷鳴音王皆從得聞如斯經典復更值遇二十億百千如來皆復同號名雷音王亦復從聞正法華經受持諷誦爲四輩說在所生處常自然獲眼淨耳淨鼻淨口淨身淨意淨視聽洞徹鼻通口辯身能輕舉意覩衆生心普爲四輩演斯經典分別其義佛語得大勢常被輕慢大士供養奉事若干億百千數如來已復更值無數億百千如來已復從受正法華經以是德本自致無上正真之道成最正覺得大勢菩薩欲知大士常被輕慢於寂趣音王如來之世爲四部人說經法者不乎則我身是假使爾時設不受是正法華經不持諷誦爲人說者

1 2 3 4 5 6 7 8 9 20

20 1 2 3 4 5 6 7 8 9 10

不能疾逮無上正真道成最正覺備從過去諸佛世  
尊聞此經典受持諷誦廣爲人說致最正覺爾時比  
丘比丘尼清信士清信女其一大士爲說經言我行  
恭敬不輕諸賢仁等當逮如來正覺道德之慧又諸  
四部輕彼大士罵詈形笑不自改者二十億千劫所  
生之處常不值佛不聞經聲又萬劫中墮無可大地  
獄考掠燒炙痛不可言罪以畢竟從地獄出以彼大  
士教化之故令發無上正真道意皆得神通慧無量  
礙今悉現在佛語得大勢欲知爾時四部毀呴形笑  
恚罵大士者不今此會中毘陀和等五百菩薩師子  
月等五百比丘比丘尼今在佛前五百清信士五百  
清信女等皆不退轉當成無上正真之道佛告得大  
勢此正法華經其義廣大威神無量一切元慶諸菩  
薩大士所當欽尚如來滅後其受斯經持諷誦讀得  
福如是逮成無上正真道於是世尊而歎頌曰

今我識念 往古過事 佛名寂趣  
音聲之王 威神無量 天人所敬  
爲諸衆生 人民講法 其佛最勝  
滅度之後 然其正法 最末世時  
有一比丘 爲菩薩行 因時號名

常被輕慢 卽時往至 於比丘衆  
及比丘尼 所覩顛倒 但勸化之  
志行佛道 自宣我心 不懷憍恣  
罵詈輕毀 每見形笑 彼時常爲  
使聞此言 假使得聞 此經法時  
若復住立 設有所作 明時慧者  
臨欲壽終 用分別說 此正法華  
尋時報應 增益壽命 變現其身  
而得自在 處在虛空 講說經典  
敎化一切 悉發道意 於時大士  
壽終沒後 逮見諸佛 億百千垓  
稍稍漸漸 開化入法 爲分別說  
於斯經卷 諸最勝子 得成爲佛  
則我身是 能仁如來 其諸比丘  
口喜誹謗 衆比丘尼 及清信士  
彼時所有 諸清信女 彼蒙開化  
開經解慧 常當覩見 無數億佛  
則毘陀和 五百人是 諸比丘衆  
及比丘尼 清信士女 今現佛前  
吾爾時悉 令聞尊法 皆開化之

使得曉了 於今佛身 減度之後

數數當受 奉斯經卷 無數億億

而當思惟 未曾得聞 如是之法

假使有佛 億百千數 常聞講說

如是比經 是故以聞 如是像典

自在聖尊 稱讚經典 我減度後

若有說此 頻數當忍 受正法華

如來神足行品第二十一

爾時于彼三千世界塵數億百千垓諸菩薩等從地  
涌出者一切皆悉住世尊前僉然又手白大聖曰如  
來滅後布露經典徧諸佛國及世尊土滅度之處於  
彼所在講說斯經多所利益若有受持此妙典要誦  
讀書寫爲人說者德不可量於是溥首處於忍界諸  
菩薩無數億百千垓受比丘比丘尼清信士清信女  
諸天龍神健沓和阿須倫迦留羅真陀羅摩休勒及  
人非人如來皆爲神足變化如來至真等正覺爲現  
瑞應悉得柔順法忍皆令書寫正法華經化異世界  
億百千數諸菩薩等各各坐于諸寶樹下師子座上  
爾時能仁世尊及此一切如來正覺現其神足具足  
充滿百千歲中有所興立應時百千歲中功德自然

而大光明滅除陰雲彈指之頃自然有聲靡不通達  
 十方佛國一切世界六反震動諸天龍神阿須倫迦  
 留羅真陀羅摩休勒承佛威神各隨所住無央數千  
 佛世界普悉覩見斯忍佛土又諸如來十方無數億  
 百千垓各各自坐諸寶樹下師子座上能仁如來多  
 寶世尊於彼七寶廟寺講堂自然嚴淨師子之座威  
 耀顯赫無數無限不可計會億百千垓菩薩大士及  
 四部衆見斯變化心中愕然驚喜無量得未曾有則  
 聞空中音聲而歌頌曰仁者欲知過是無限不可思  
 議億百千垓諸佛世界有佛世界名曰忍土於彼有  
 佛號能仁如來爲諸菩薩大士講正法華經方等典  
 詔一切諸佛普護斯經用救菩薩大士以故諸賢心  
 當質直清淨稽首歸命勸讚奉侍供養彼能仁正覺  
 於時衆生聞虛空中自然之音有佛世尊號曰能仁  
 適聞名稱應時又手以若干種華香衣服幢旛雜香  
 舉手各各散忍世界瓔珞珠璣諸貫真珠如意寶珠  
 而供養之其華香幢蓋瓔珞珠璣明月寶珠自然入  
 於忍世界尋時合會爲寶華蓋在於虛空悉覆諸佛  
 及菩薩上彼時世尊告諸異行及佛前住諸菩薩衆  
 如來正覺功德威神不可思議諸族姓子於無數億

那術百千垓劫說此經義不可究竟雖無央數若干種經所不能及不可限盡欲度彼岸難得邊際諸族姓子舉要言之假使有人欲了斯經要悉佛威神普諸佛法諸世尊界諸佛精進諸佛閒居諸佛妙力示現是經故族姓子佛滅度後當以殷勤求此經典受持書寫精進奉行供養承事爲他人說設使有人賣此經行講讀書寫思惟奉宣著於竹帛若在精舍齋堂室宅大林樹下若在水邊當起塔廟所以者何則爲如來所處之地觀是道場佛所坐樹則當察之一切如來正覺所遊羣聖世雄轉法輪處十方諸佛在中滅度等無差特於斯世尊而歎頌曰

世愍哀法 不可思議 而常建立  
神通之慧 而復示現 普等明目  
衆生一切 悉得歡喜 其舌神根  
暢音梵天 演奮光明 億百千垓  
諸羣萌類 靥見神足 怪未曾有  
皆立大道 又聖導師 興一大光  
彈指之頃 宣洪音聲 卽時普告  
一切佛土 周徧十方 諸佛世界  
如此變化 及餘感動 大聖所現

瑞應如是　如來爾時　皆令歡喜  
佛滅度後　奉是經卷　安住宣暢  
功德之法　無央數劫　不可思議  
持此經卷　福祚之限　導師咨嗟  
若干無量　欲盡其限　不得邊崖  
猶如虛空　不可窮極　名稱至德  
無能思惟　持是經者　淨德常然  
則爲見佛　大聖導師　及吾於世  
減度大通　及此一切　諸菩薩衆  
并復覩此　四部之會　其有值遇  
斯經典者　則爲遭見　今日衆會  
佛滅度時　亦復在此　及彼十方  
諸佛世界　其有能持　此經卷者  
則爲覩覲　諸過去佛　及於十方  
今現在佛　目自面見　供養奉侍  
志當悅意　向人中上　在於道場  
所可思惟　當速受持　於此經典  
自然辯才　無所罣礙　設本種命  
不能長者　當分別曉　於斯法義  
便當受持　於此尊經　曉了諸經

次第所歸 大聖世尊 減度之後

假使有人 至誠說者 分別此經

義理所趣 則講審諦 諸經卷義

其人光明 分別所覺 譬如日月

普照遠近 遊於天下 在所至到

勸化發起 無數菩薩 是故智慧

諸菩薩衆 聞如是像 經無等倫

我滅度後 奉此經典 其人不疑

於佛大道

藥王菩薩品第二十二

於是宿華王菩薩前白佛言藥王菩薩以何等故遊忍世界堪任無數勤苦之難善哉天尊願爲十方諸佛世界菩薩聲聞雲集於斯若有聞佛班宣藥王初發道心宿行功勲爲令衆會及後來世普聞受持追學究竟天人龍鬼諸尊神王僉皆悅豫發大道意自致正覺度脫一切於時世尊見宿華王發心至誠爲一切諸佛讚曰善哉善哉乃爲將來諸菩薩施勸進後學令人道智諦聽諦聽善思念之唯然世尊願樂欲聞佛言乃往過去江河沙劫爾時有佛號離垢日月光首如來至真等正覺出現於世其土壽命四萬

二千歲教化衆生濟度危厄於時十方菩薩大會有  
八千億諸聲聞衆七十二江河沙等又其佛土而無  
女人三惡之趣阿須倫八難之患其地平正紺瑠璃  
色衆寶校成莊嚴清淨生衆寶樹周回圍繞珍奇瓊  
珞周匝覆蓋豎諸幢旛寶瓶香爐燒衆名香一切樹  
下設寶牀榻坐具嚴飾不可稱載諸坐具上有百千  
億諸天坐之鼓諸音樂歌佛功德以爲供養於時其  
佛爲諸菩薩及聲聞衆分別講說正法華經時有菩  
薩名衆生喜見聞佛敷演散解義要卽奉佛法遵習  
苦行夙夜精進萬二千歲經行不坐竟萬二千歲卽  
便逮得普現三昧逮是定已輒復思惟吾以逮是普  
現三昧便能致此正法華經因逮定意踊躍歡喜心  
自念言我當供養離垢日月光首如來至真奉正法  
華經卽如其像三昧正受處在虛空而以天華雜香  
栴檀用供養佛應時佛所雨衆華雜香普熏十方諸  
佛世界其聞香者悉得法忍衆生之類和心相向衆  
生喜見菩薩從定意起重自思惟雖用雜物供養於  
佛不能暢盡至真之德以身供養爾乃無上尋如所  
念斷絕五穀專食衆香衆華香汁而以飲之日使身  
中內外皆香如是服香竟十二年復和衆香以塗其

體香油潤衣而立誓願以爲身燈爲一切故卽然其  
身供養諸佛以精誠故其光徧照八十江河沙諸佛  
世界應時諸佛同聲讚曰善哉善哉族姓子精進乃  
爾世之希有斯真供養如來經典乃爲衆生忍苦不  
勞超踰天人一切所行國財妻子施所不及供養之  
中爲尊爲上爲最爲長爲無儔匹以身施者乃成法  
施諸佛世尊歎是德已則便默然於時菩薩自然其  
身千二百歲火故不滅用一心故無有苦患於是之後  
火燄乃息勤修精進供養法故於是終沒還生其  
世更復值見離垢日月光首如來至真之士生離垢  
施國王宮內自然化生結跏趺坐而爲父母說此頌  
曰

尊王識念我本行      堅強勤修大精進  
所重愛身以用施      誓立住此逮三昧

說此偈已啓其父母離垢日月光首如來至真今故  
現在吾往昔時至心供養因是逮致了一切音總持  
法要是正法華無上經典學中要者經卷本有八十  
垓百億那術垓偈當一心思何所造作立佛像模而  
常心中而無瞋怒此正法華菩薩所行吾本宿世習  
若干千億百千垓偈從彼如來而聞受之離垢施王

讚其子曰善哉善哉當共俱往躬身當觀供養聖尊說此言已與父王俱涌在空中去地七仞經行虛空足不蹈地其身正坐七寶玲瓏珍奇帳中往詣佛所又手禮佛以頌讚曰

人中之尊 頰姿離垢 其光巍巍  
照於十方 吾本供養 聖尊無極

今復自親 故來奉面

爾時衆生喜見菩薩大士說此偈已前白離垢日月光首如來至真世尊垂恩愍哀十方故復現在訓誨一切度脫衆生無不蒙賴時離垢日月光首如來告衆生喜見菩薩今時已至吾欲滅度以此法教而相屬累佛因其時至所教周悉亂世欲到吾捨去矣爲佛施座今取滅度又告之曰以斯經典重相屬累普令流布等潤十方咸使一切皆蒙福慶衆生喜見則曰受教其佛夜半便取滅度於時菩薩衆生喜見見佛滅度以栴檀香奇異妙香闇維佛身取其舍利香水酒之感慕哀泣淚下如雨修造寶瓶八萬四千立七寶塔高至梵天莊嚴幢蓋懸衆寶鈴心自念言吾已供養世尊舍利當復更事超過於前告諸菩薩及大聲聞諸天龍神一切人民諸族姓子咸共思念世

尊舍利普共供養於是佛告宿華王菩薩當爾世時  
衆生喜見菩薩勸率衆人供奉舍利八萬四千塔於  
塔寺前建立形像百福德相然無數燈燒香散華光  
顯道法供養奉事七萬二千歲供養訖竟在其衆會  
化無數千諸聲聞衆開諸菩薩皆令逮得普現三昧  
見衆菩薩逮立定已自現其身諸根缺漏諸菩薩衆  
及諸弟子天龍鬼神舉聲號咷淚下如雨是族姓子  
衆生喜見菩薩大士是我等師開化我黨今現缺減  
諸根不具是故悲酸不能自勝於時衆生喜見謂諸  
菩薩及大弟子諸天龍神吾建要誓至誠之願如我  
所言隨順不虛我此手臂成紫金身令我手臂平復  
如故地當大動於虛空中雨衆華香所言適竟地卽  
大動天雨衆華尋時手臂平復如故衆生喜見欲度  
一切因示現此慧力所行福德功勲勢力所致佛告  
宿華王菩薩欲知爾時衆生喜見菩薩大士今藥王  
菩薩是又族姓子菩薩勤苦不可稱計投身棄命無  
有限量常建大乘志無上道興發大功無極之德於  
如來前然一足指功德難喻況然其身以爲供養勝  
施國土妻子血肉設以珍寶滿佛世界布施供養諸  
佛聖衆福德雖多不及於彼所以者何福報有盡無

正法華經卷第十一

二十六

木州

益衆生若族姓子女受正法華一四句頌分別奉行  
爲人解說比其福施萬不如一猶如巨海萬川皆歸  
此經如是一切諸法最爲元首猶若須彌衆山中高  
如盛月滿星中最明大慧光明照曜三界爲諸法首  
無上道王猶如日出普照天下消衆幽冥此經如是  
蠲除一切愚癡闇蔽皆入道明猶天帝釋忉利天上  
諸天中王此經如是一切諸法衆經典主攬持十方  
度脫一切猶梵天王處第七宮制御諸天莫不奉命  
此經如是普濟衆生學與不學教導三乘行君父業  
猶如四道及至緣覺皆越一切諸凡夫學正法華經  
亦復如斯皆超一切上中下乘處衆生之源化諸不  
逮猶如菩薩所行高遠過諸聲聞緣覺之業覆護三  
世此經如是調御諸法悉令成就無上正真猶如世  
尊三界法王被道服飾三十二相誘衆愚蔽此經如  
是從菩薩學乃至如來開導聲聞諸緣覺等皆使成  
就無上正真猶族姓子斯經典者爲三界護度脫衆  
生危厄之難飽滿饑虛衆情之患寒者溫煖熱者清  
涼有裸露者皆得衣服開導衆生悉令入道猶如導  
師將護衆賈菩薩如是養育衆生若如慈母譬如船  
師度人往返菩薩如是周旋三界度脫一切滅衆闇

冥猶如炬火化生老死猶轉輪王制御四域此經如是以聖道明照曜三世猶如大明消天下冥此經如是致不退轉無所從生忍至成佛道佛告宿華王菩薩斯經典者度脫一切衆苦之患拔斷諸垢三毒疹疾救濟生死諸繫牢獄若聞此經尋卽解了能書寫者其功德福無能稱計何況聞持懷抱誦說華香供養雜香澤香然燈幢旛若有聞持藥王菩薩往古學品受持思念之其福過彼衆物供養不可稱載若有女人聞此經法尋卽受持便於此世畢女形壽後得男子若有女人於五濁世最後末俗聞是經法能奉行者於是壽終生安養國見無量壽佛與諸菩薩眷屬圍繞生寶蓮華坐師子座無姪怒癡除去衆結亦無貪嫉未曾懷恨適生其國得五神通速不退轉不起法忍已逮法忍輒得覩見七十二億兆載江沙諸如來衆適見諸佛眼根清淨眼根已淨所見一切十方諸佛遙讚歎之善哉善哉族姓子汝乃值是能仁佛世聞佛所說正法華經受持諷誦爲他人說此功德福火不能燒水不能漂盜賊怨家縣官不侵干佛嗟歎不能究暢所獲功祚不可限量巍巍如是緣斯功德降伏衆魔棄諸怨敵度生死難周旋諸患又族

姓子以是經法伏衆惡逆爲諸千佛所見建立擁護汝身天上世間而無儔匹自捨如來未有聲聞及諸菩薩功德福祐智慧定意無有等侶佛告宿華王菩薩若有人受是經者所逮聖明勢力盛德超越若斯是故仁者若有講說此藥王品有讚善者後生爲人口中自然優鉢華香身栴檀香若聞此經讚歎善者其人現在功德遠聞佛已豫歎其人功勲佛告宿華王吾以是經囑累汝等衆生喜見往古法品最後末俗五濁之世流布天下闇浮利內無能中壞其魔波旬不能得便及魔官屬邪神鬼魅無能害者天龍羅刹鳩洹魘鬼無敢當者又宿華王是藥王品威德所立所流布處若有疾病聞是經法病則消除無有衆患因是功德後致正真無老病死若有比丘最後末世手執青蓮滿盛雜香供散法師心自念言假使有人求菩薩乘至此道場吾授斯華以爲草座敷佛樹下降伏衆魔具足法鼓吹大法螺緣此濟度生死之海若大乘學見諸比丘持是經卷當觀其人功德如是佛說是藥王菩薩往古品時入萬四千菩薩卽逮得曉一切音方便總持於時衆寶如來讚言善哉善哉宿華王菩薩卿能諮啓不可思議經典行業如來

講說何以快哉

正法華經卷第九

音釋

鳩鵠

鳩古肴切鵠鳥名笮側伯切

疾置切

猝虛

一切

經切鳩鵠鳥名笮側伯切

疾置切

猝虛

颶陀

楚語也此云護颶蒲撥切

牛牝也

餚氣

眇

徒刀切號

牛也

餌氣

正法華經卷第十

休寧沙門如顯

性覺海嶽泊全本邑居

此

壬

程

起

家

第

九

卷

十

正

法

華

經

卷

第

十

妙吼菩薩品

第二十三

西晉

三藏

竺法護

譯

王

智

雲

尊

者

丁

妙

吼

菩

薩

品

第

二

三

藏

竺

法

護

譯

王

智

雲

尊

者

丁

煥

祖

共

施

刻

此

卷

十

正

法

華

經

卷

第

十

於是世尊能仁如來卽從眉頂大人之相演百千光  
照於東方千八萬百億江河沙諸佛國土靡不周徧  
過是諸佛土有世界名莊嚴照明其土有佛號離垢  
紫金宿華王如來至真等正覺與無央數諸菩薩衆  
眷屬圍繞宣布道化能仁如來所演光明徧照彼土  
又其佛土有一菩薩名曰妙音從過去佛植衆德本  
供養無數百千兆垓諸佛正覺每見諸佛諮詢受經典

逮成聖慧以得尊幢三昧定法華三昧施離垢三昧  
 樂宿王三昧無著光三昧慧印三昧普曉諸音三昧  
 等集衆德三昧喜信淨三昧神足戲樂三昧慧光三  
 明嚴淨王三昧離垢光三昧離垢藏三昧無緣三昧  
 日轉三昧取要言之普悉逮得億百千垓江河沙數  
 諸三昧定其佛光明普徧周至照妙音菩薩妙音菩  
 薩蒙佛聖光自詣佛所白世尊曰我欲往詣至忍世  
 界見能仁佛稽首作禮諮受經典及欲致敬文殊師  
 利藥王菩薩妙勇菩薩宿華王菩薩尊意行菩薩淨  
 王菩薩超藥菩薩諮講經義受諸不及令一切聞悉  
 發道意其佛告曰往族姓子雖到彼土莫發異想而  
 念其土懈廢下賤所以者何又族姓子彼忍世界其  
 大陸地黑山雜糅衆垢石沙穢惡充滿谿澗山谷不  
 與凡同其土佛身卑小丈六菩薩諸身長七八尺又  
 卿本體高四萬二千踰旬而我現身八萬四千踰旬  
 端正殊好色像第一威耀殊妙相好顏色難可比喻  
 積百千德覩莫不歡又卿往至見彼土人慎莫心念  
 起不可想如來菩薩佛土不如所以者何佛土本空  
 衆生罪福現有不同妙音菩薩復白佛言承佛威神  
 如來聖力道德巍巍以自娛樂往詣忍世界如來道

慧清淨之業輒當如法無所違失不敢起想於時妙音菩薩心自念言不起于座卽如其像三昧正受到忍世界至靈鷲山當在如來法座中間化作八萬四千億衆寶蓮華紫金莖白銀葉嚴飾淨好光明巍巍照諸會者輒如所念卽時辦矣文殊師利問能仁佛唯然世尊今化現此八萬四千衆寶蓮華紫金莖白銀葉清淨嚴好此誰瑞應而現此變佛告文殊有菩薩名妙音從紫金離垢宿華王佛土而來與八萬四千菩薩俱進至此忍界欲見吾身稽首諮問欲得聽聞正法華經故先現瑞文殊師利復問佛言其人宿本積何功德造殊妙行而今致此奇特洪勳在何三昧本造立行願欲聞之所行三昧神足變化吾等聞之當受奉行見諸菩薩顏貌色像爲何等類舉動進止何所饒益甚哉世尊唯現瑞應使諸菩薩來現於此衆會欲見佛語文殊卿當啓白衆寶如來今現瑞應使諸菩薩咸來至此各現身相一切衆會皆欲見之文殊師利卽受佛教輒啓滅度衆寶如來尋現瑞應於時妙音菩薩而於本土忽然不現與八萬四千菩薩俱動諸佛土雨寶蓮華同時發作百千億妓樂諸來菩薩各自現形其眼明好猶如紺色顏貌充滿

如月盛明體紫金光無央數億百千功德莊嚴其身  
威神巍巍智慧光光奇相衆好文飾光顏身力無極  
其身處在七寶紋絡於虛空中去地四丈九尺與諸  
菩薩眷屬圍繞到忍世界至靈鷲山下寶紋絡手執  
寶瑛其價百千詣能仁佛稽首足下以持貢上能仁  
如來復白佛言紫金離垢宿華王如來致問無量起  
居輕利由步康強又問世尊說法如常乎衆生一切  
受者增進耶蠲除狐疑順法律不也將無多懷姪怒  
癡行憎嫉饕餮不能恭敬孝順父母聽受道法如法  
奉行不墮邪見愛惜財寶諸根不定爲降諸魔衆官  
屬乎又諸衆生聽受減度衆寶如來所說法耶今諸  
菩薩故來詣此本土如來之所發遣欲得奉見七寶  
塔寺減度衆寶如來問訊啓受聖體康寧說法如何  
衆生普受行如法不衆寶如來現住久如我等故來  
欲得覩見衆寶如來形像所類願佛現之時能仁佛  
語衆寶如來今妙音菩薩及諸眷屬欲見世尊聖體  
形像衆寶如來尋時讚曰善哉善哉族姓子卿能故  
來見能仁佛稽首諮受正法華經及復欲覩文殊師  
利啓諸不逮時蓮華首菩薩問佛妙音菩薩往宿命  
時積何德本乃致斯變無極神聖時能仁佛告蓮華

首菩薩曰乃往過去久遠世時有佛號雲雷音王如來至真等正覺講說經道六度無極菩薩法藏天上天下靡不蒙安時妙音菩薩聞其所說欣然意解鼓百千音樂娛樂其佛八萬四千衆寶妙器貢上至尊如是精進供養如來萬二千歲又族姓子妙音菩薩往宿命時從雲雷音王如來之世修無上法種此功德未曾懈廢傳如來旨化諸愚冥不識至真悉令信樂欲知爾時妙音菩薩今妙音菩薩是也用彼世時布施寶器衆妓樂音又復供養無數諸佛億千佛所植衆德本修治衆行前世值遇億百千妓江河沙等諸佛世尊今蓮華首爲見妙音菩薩所行不可限量變無數形爲諸衆生宣布講化正法華經或現梵天形色貌而誘立之或現天帝形或尊豪形或將軍形化導衆兵或息意天王轉輪聖王諸散小王尊者長者諸令長形沙門梵志形像色貌說正法華經或現比丘比丘尼清信士女形宮人妓女長者夫人諸貧賤女形男女大小而誘立之說正法華經或阿須倫形迦留羅真陀羅摩休勒人非人形像色貌而誘立之說正法華經或入地獄餓鬼畜生及諸八難所在擁護而救濟之上中下士前後進退隨其形體男女

之像而開化之說正法華經或入中宮化皇后形度  
衆貴人蓮華首當知妙音菩薩將護忍界一切衆生  
又族姓子妙音菩薩以若干變無數方便誘忍佛土  
演正法華經神足威德未曾損耗而復增益也聖慧  
道智亦復如是又族姓子妙音菩薩光明功德智慧  
巍巍周旋十方隨時開化輪轉無際皆使入律上中  
下願各令得所還遊忍界復至他方江河沙佛土現  
菩薩身而爲說法又現聲聞緣覺色像而開化示本  
行所學聞之亘然各成所志不違本誓若有衆生奉  
如來律以佛色像隨其道律示現形貌顯授大道無  
上正真欲慕泥洹現已滅度因而示儀開化道慧妙  
音菩薩勢力聖智不可測度超絕巍巍功德若斯無  
以爲喻於是蓮華首菩薩前白佛言妙音菩薩積功  
累德堂堂乃爾唯然世尊住何三昧開化衆生不可  
限量能仁如來告蓮華首菩薩曰族姓子聽有三昧  
名現入衆像妙音菩薩住斯定意利益開化無限衆  
生使入道義佛說是妙音菩薩章句品時其諸菩薩  
與妙音開士俱發來者尋時皆逮現入衆像三昧正  
定其行殊勝於是忍界超越菩薩所修定意諸有限  
數若有逮致現入衆像三昧便得總持攬持三世無

不蒙濟時妙音菩薩供養能仁如來至真具足奉事衆寶如來塔寺舍利欲還本土前稽首禮能仁如來自歸而退與衆會別動震諸國雨衆蓮華同時和鼓百千億妓雅頌妓樂與八萬四千諸菩薩衆俱歸本土前稽首禮妙紫金離垢宿華王如來以詣忍界導利衆生又覩衆寶如來寶寺舍利及文殊師利藥王菩薩所逮精進無極道力見妙勇菩薩令是八萬四千菩薩皆得正行現入衆像三昧往到彼間俱共進行四萬二千天子聞正法華經皆悉逮得無所從生法忍蓮華首菩薩逮正法華定

光世音普門品第二十四

於是無盡意菩薩卽從座起偏露右臂長跪叉手前白佛言唯然世尊所以名之光世音乎義何所趣耶佛告無盡意曰此族姓子若有衆生遭億百千妓厄患難苦毒無量適聞光世音菩薩名者輒得解脫無有衆惱故名光世音若有持名執在心懷設遇大煥然其山野燒百草木叢林屋宅身墮火中得聞光世音菩薩一心自歸則威神護令不見溺使出安隱若入大海百千億妓衆生豪賤處海深淵無底之

元採致金銀雜珠明月如意寶珠水精瑠璃碑磣  
礪珊瑚琥珀載滿船寶假使風吹其船流墮黑山回  
波若經鬼界值摩竭魚衆中一人竊獨心念光世音  
菩薩功德威神而稱名號皆得解脫一切衆患及其  
伴侶衆得濟渡不遇諸魔邪鬼之厄故名光世音也  
佛言族姓子若見怨賊欲來危害卽稱光世音菩薩  
名號而自歸命賊所持刀仗尋段段壞手不得舉自  
然慈心設族姓子此三千大千世界滿中諸鬼神衆  
邪逆魅欲來燒人一心稱呼光世音菩薩名自然爲  
伏不能妄犯惡心不生不得邪觀若人犯罪若無有  
罪若爲惡人縣官所錄縛束其身杻械在體若枷鎖  
之閉在牢獄拷治苦毒一心自歸稱光世音菩薩名  
號疾得解脫開獄門出無能拘制也故名曰光世音  
佛言如是族姓子光世音菩薩境界威神功德難可  
限量光光若斯故號光世音佛告無盡意假使族姓  
子此三千大千世界滿中衆逆盜賊怨害執持兵仗  
刀刃矛戟欲殺萬民一部賈客獨自經過在於其路  
齋持重寶導師恐怖心自念言此間多賊將無危我  
劫奪財寶當設權計脫此衆難不見危害謂衆賈人  
不宜恐畏等共一心俱同發聲稱光世音菩薩威德

輒來擁護令無恐懼普心自歸便脫衆難不遇賊害  
衆賈人聞悉共受敎咸俱同聲稱光世音身命自歸  
願脫此畏適稱其名賊便退却不敢觸犯衆賈解脫  
永無恐懼光世音菩薩威德境界巍巍如是故曰光  
世音佛復告無盡意菩薩若有學人姪怒癡盛稽首  
歸命光世音菩薩姪怒癡休觀於無常苦空非身一  
心得定若有女人無有子姓求男求女歸命光世音  
輒得男女一心精進自歸命者世世端正顏貌無比  
見莫不歡喜所生子姓而有威相衆人所愛願樂欲  
見植衆德本不爲罪業其光世音威神功德智慧境  
界巍巍如是其聞名者所至到處終不虛妄不遇邪  
害致得無上道德果實常遇諸佛真人菩薩高德正  
士不與逆人無反復會若聞其名執持懷抱功德無  
量不可稱載若有供養六十二億恒河沙數諸菩薩  
等是諸菩薩皆使現在等行慈心若族姓子族姓女  
盡其形壽供養衣被飲食牀臥具病瘦醫藥一切所  
安福寧多不無盡意曰多矣世尊不可限量所以者  
何是諸菩薩無央數億不可譬喻佛言雖供養此無  
限菩薩不如一歸命光世音菩薩稽首作禮執持名  
號福過於彼況復供養雖復供養六十二億恒河沙

數諸菩薩等執持名號計此二福億百千劫不可盡  
極終不相比是故名曰光世音於是無盡意菩薩前  
白佛言光世音菩薩以何因緣遊忍世界云何說法  
何謂志願所行至法善權方便境界云何佛言族姓  
子光世音菩薩所遊世界或現佛身而班宣法或現  
菩薩形像色貌說經開化或現緣覺或現聲聞或梵  
天像或天帝像而說經道或捷沓和像欲度鬼神現  
鬼神像欲度豪尊現豪尊像或復示現大神妙天像  
或轉輪聖王化四域像或殊特像或復反足羅刹形  
像或將軍像或現沙門梵志之像或金剛神隱上獨  
處仙人童孺像光世音菩薩遊諸佛土而普示現若  
干種形在所變化開度一切是故族姓子一切衆生  
咸當供養光世音其族姓子所可周旋有恐懼者令  
無所畏已致無畏使普安隱各自欣慶故遊忍界於  
是無盡意菩薩卽解己身百千寶瓔以用貢上於光  
世音惟願正士受此法供己身所有外異寶瓔而不  
肯受時無盡意復謂光世音惟見愍念以時納受願  
勿拒逆時光世音心自計念不用是寶無盡意言惟  
復垂愍諸天龍神捷沓和阿須倫迦留羅真陀羅摩  
睂勒人及非人受其實瓔輒作兩分一分奉上能仁

如來一分供養衆寶如來至真等正覺貢上寶寺其族姓子普爲一切以是之故神足變化遊憇世界無所不濟於是持地菩薩卽從座起前白佛言假使有人聞光世音所行德本終不虛妄世世安隱至無極慧其光世音神足變化普至道門所顯威神而無窮極佛說是普門道品彼時會中八萬四千人至無等倫尋發無上正真道意

總持品第二十五

於是藥王菩薩卽從座起長跪又手前白佛言若族姓子及族姓女聞是正法華經典受持懷抱書寫經卷獲福如何佛言族姓子女受持是經誦在懷抱書寫經不可量無以爲喻若族姓子供養八十億百千垓恒河沙諸如來衆若復受持懷抱書寫是正法華經講說供養何所福多於意云何寧當一心奉持經典若以衣食供養諸佛藥王菩薩白佛言若族姓子及族姓女受正法華經典之要執持書寫一句頌講說諷誦若復奉行具足成就其福最多勝於供養若干恒河沙諸佛世尊佛言甚哉法之供養最爲第一藥王菩薩復白佛言我當擁護如是等輩諸族姓子及族姓女受此經者斯法師等以義宿衛長

使無患誦總持句又尋祝曰

奇異所思意念無意永久所行奉修寂然憺怕志默解脫濟度平等無邪安和普平滅盡無盡莫勝玄默憺然總持觀察光耀有所依倚恃怙於內究竟清淨無有坑坎亦無高下無有迴旋所周旋處其目清淨等無所等覺已越度而察於法令衆無音所說鮮明而懷止足盡除節限宣暢音響曉了衆聲而了文字無有窮盡永無力勢無所思念

藥王菩薩曰唯然世尊是總持句六十二恒河沙諸佛所說假使有犯此祝言者若復違毀此等法師爲失諸佛世尊道教佛歎藥王菩薩大士善哉善哉若族姓子說總持句爲衆生故愍念擁護多所安隱於時妙勇菩薩前白佛言唯然世尊我身亦爲衆生之故欲令永安若有奉持此經典者授總持句將護如此諸法師等令無伺求得其便者鬼神諸魍魎廁衆鬼突鬼魘鬼餓鬼反足雖欲來燒無能得便妙勇菩薩專心思惟說此總持曰

晃耀大明燄光演暉順來當章悅喜欣然住此管制永住無合無集

是總持句恒河沙等諸佛所說咸共勸助若違如來

如是比像諸法師教還自危已時毗沙門天王前白  
佛言我亦當演此總持句加以慈心爲衆生故擁護  
法師

富有調戲無戲無量無富何富

以是擁護諸法師等百由旬內無敢犯觸宿衛將順  
諸族姓子如是比像至學法師乃能受持以是擁護  
常獲吉利時順怨天王在彼會坐與諸香音億百千  
垓鬼眷屬圍繞往詣佛所前白佛言唯然世尊我亦  
當宣此總持句

無數有數曜黑持香焰祝大體于器順述暴言至有  
唯然世尊此總持句四十二百億諸佛所說以此總  
持擁護供養諸學經者令無伺求得其便者時有一  
魅名有結縛復名離結復名施積復名施華復名施  
黑復名被髮復名無著復名持華復名何所復名取  
一切精往詣佛所鬼子母與諸子俱異口同音前白  
佛言我等世尊常當擁護如是比像諸法師等加施  
吉祥令無伺求得法師短于時諸魅同共舉聲宣此  
總持將順法師

於是於斯於爾於氏極甚無我無吾無身無所俱同  
已興已生已成而住而立亦住嗟歎亦非消頭大疾

無得加害

是等之類是我眷屬令無所犯擁護法師消除鬼神諸魑魅餓鬼溷鬼突鬼蠱道符祝癡狂顛鬼化是像來若鬼神形及非人像二日三日若至四日若常熟病若復夜臥值惡夢者若現男女大小諸像我等擁護令無伺求得其便者於時諸魅共於佛前說此頌曰

犯頭破七分 猶如華菜剖 當致殺母罪

亦得害父殃 其有犯法師 皆當獲此疊

世世得不安

不與諸佛會

破壞佛寺罪

鬪亂聖衆殃

如合衆麻油

麻油聚一處

放火皆熾然

消盡無有餘

其有犯法師

當獲此罪殃

猶如稱戴峻

罪垢之所聚

其有犯法師 當獲此重疊

諸鬼神軍頭等說此偈已前白佛言我等咸護如是比像諸法師等使常安隱除去怨敵周市宿衛令無傷害若有行毒毒爲不行時佛嗟歎諸魅所祝善哉善哉汝等乃欲護諸法師若聞此經宣持名號德不可量何況具足隨時持說書在經卷若以供養華香幢蓋雜香擣香然燈懸繪思夷合歡青蓮紅蓮黃蓮

白蓮消著油蘇以用然燈供養此經勤修不懈百千  
億倍福不可限汝等當護如是比像精進學者佛說  
是總持品時六萬八千人逮得無所從生法忍  
住世淨復淨王品第二十六

佛告族姓子乃往過去無央數劫不可思議長遠難  
量爾時有佛號總水雷音宿華慧王如來至真等正  
覺明行成爲善逝世間解無上士道法御天人師爲  
佛世尊世界曰照明嚴飾劫曰愛見又族姓子於其  
佛世有王名淨復淨爾時其王有一正后名曰離垢  
施其后有二子一名離垢藏二名離垢目又其二子  
皆得神足輕舉能飛智慧具足功德備悉聖達巍巍  
行菩薩業夙夜精進未曾懈廢勤心專精六度無極  
善權四等所濟無限悉達通達三十有七道品之法  
普暢道義所旋周業進逮離垢三昧定矣度宿日光  
三昧離垢光三昧離垢顯耀三昧淨莊嚴三昧大威  
藏三昧皆得通達此三昧定而度無極時佛集會與  
諸四輩釋梵四天王諸天人班宣分別正法華經  
時佛愍念一切衆生哀傷國王皆欲化之使入大道  
又族姓子其二太子往詣母所叉手白言惟願屈意  
見念加慈專精身心欲往到佛所奉見如來身亦自

欲稽首歸命所以者何今日如來爲天上天下一切  
衆生廣宣要典正法華經故當奉觀聽正法華離垢  
施后告二太子汝等父王志存外邪信樂梵志常懷  
瞋恨以是之故不可得往時二太子同心又手自復  
白其母我等薄相所生邪見無義之家又我等身本  
是法王子當以經道化于濁俗反僞向真爾乃佛子  
於是離垢施后告二太子善哉行矣汝真孝子爲其  
父母修大慈愍各顯神足覩之欣然心中開解便聽  
子等俱詣佛所稽首受業時二太子輒受母教其身  
涌住在虛空中去地七仞愍念其親各現威變在於  
虛空二人俱時坐臥經行身上出火身下出水身上  
出水身下出火演大光明照耀遠近現身長大復還  
爲小從虛空下入于地中若人入水從地涌出處在  
虛空猶如履地其二太子現若干變而顯神足以用  
開化於其父母于時父王覩其二子神足變化威德  
若斯欣然踊躍善心生焉躬身叉手向二子曰汝等  
師主所受誰乎時二太子自啓父王大王欲知我等  
師主總水雷音宿華慧王如來至真是我等師主今  
者現在遊於寶樹下處于法座爲四部衆諸天人民  
廣演宣布正法華經其佛世尊是我等師主也王告

二子吾欲往詣卿等師主奉觀親受大聖正真無上  
言教時二子從虛空下行至母所自白其母而又手  
言阿母威德則化父王以造立心無上正真因成道  
教聖尊之業唯垂愍念聽我詣佛出家爲道得作沙  
門時二太子爲母說偈

唯母聽我等 出家爲沙門

如來甚難遇

曼時當精學 所云難得值

猶如靈瑞華

難遇復超彼 閒靜不可得

於時王后離垢施而頌告曰

吾以聽汝等 善哉子輒去

至聖甚難值

我亦出家俱

爾時二太子歎是法頌報父母已重復白父王及所  
生母唯願二親同時一心俱往詣總水雷音宿華慧  
王佛所屈意時發見彼世尊稽首歸命所以者何二  
親當知佛興難值猶靈瑞華亦如意最上明珠佛  
亦復然不可再遇是故我等來生此土心念出家功  
德第一由是之故不宜有難便可相許報言善哉得  
出家學棄捐愛欲捨其俗業所以者何若覩如來福  
慶無量人命難得佛世難值離於八難得閒靜難猶  
死更生父王皇后報子言諾宜知是時佛言族姓子

爾時淨復淨王宮內入萬四千宮人女宿命本德應得啓受是正法華經典本是道器離垢目太子宿命本修行積功累德從來無限離垢藏太子無央數億百千垓劫往昔宿命曾以奉行棄於衆生一切惡趣三昧正定何謂棄於衆生一切惡趣三昧正定其王正后二太子母離垢施者曉十方佛一切道同諸佛要集諸佛奧藏無極聖慧以權方便現于女身也佛告族姓子時王淨復淨見二太子所現神足化入如來至真之法以得超越展轉相教展轉相成多所度脫一切盲冥咸入道明便自發意與其眷屬四萬二千離垢施后與諸羣黨隨二太子中宮女羣臣百官一時和同往詣佛所稽首足下退各就坐從本常位時佛見淨復淨王與大眷屬自投歸命因其本行觀宿所緣而爲說法應病與藥各得開解欣然踊躍善心生焉更立國王荊駕印綬與其正后離垢施及二太子宮人女一切宮屬棄國捐王行作沙門已作沙門八萬四千歲奉修道業思惟觀察是正法華經典之要諷誦奉行如佛所教無所違失於是淨復淨王遵奉勤修正法華經與其眷屬竟八萬四千歲逮衆德本嚴淨三昧正定適逮斯定其身卽時涌

在虛空去地四丈九尺住於虛空遙自總水雷音宿  
華慧王如來至真唯然世尊其二子者則是聖師化  
導吾家蒙其恩德獲現神足顯揚變化而緣是現所  
化神變心得開解退俗入道承佛法訓度衆穢厄順  
從法律堅住無極得奉如來啓受經法乃爲至聖無  
蓋善師是二子者示現子像生我家耳皆是宿世明  
識本德承佛仁慈非是凡庶之可思論佛告王曰如  
是如是大王如大王所言是二太子宿植德故乃能  
示現因欲開王及諸眷屬一切衆生佛言大王若族  
姓子及族姓女學是經典所生之處周旋終始易得  
善師顯世尊教得立無上正真之道開化導示度脫  
一切是爲微妙無極之業展轉相教展轉相成得至  
聖諦無極之處值佛道法王用遇善師得見如來啓  
受經法由勸助恩王今寧見此二太子是諸族姓子  
前世已曾供養奉事六十五億百千兆垓恒河沙等  
如來至真而復受持是正法華經愍傷衆生沒在邪  
冥九十六種不能自濟故開化之令住正見修行精  
進求佛大道於是佛語族姓子曰其淨復淨王於彼  
世時歎衆功德從虛空下卽又十指前白其佛唯佛  
宣布如來至真本宿命時行何功德聖慧巍巍眉間

之相演大輝耀照無限國而目明好徹覩十方其眉間相白如阿雪柔軟細好巍巍光澤平正無邪無所不照世尊面像充滿如日安住道目猶如月初一切觀之而無狀極於時國王說此頌曰

其殊異功勲 巨億百千妓 虛空尚可喻  
其慧不可限

佛以頌答曰

前世行中正 加施人平等 故使眉間相  
所照無有限 和視施燈慧 目明喻日月  
其眼如月初 徹覩十方國

時王嗟歎已又手白佛至未曾有如來至真之教弘慈無極不可思議功德具足敷演道義施設法禁令無罪豐長塗之難皆得無患唯然世尊如吾今日心不放逸由得自在不墮邪徑棄捐自大不從虛偽亦無瞋恨不興惡心無益之業我國多事欲出家學不還中宮重欲自歸所有供養佛言大佳時王卽起稽首佛足其王正后離垢施者解身百千所著寶瓔以散佛上佛之威神化成七寶交露之帳化爲交露琦異妙帳自然有牀布以無數琦異坐具如來坐上於時國王心自念言至未曾有天尊至得交露帳中所

見如來甚大端正威神巍巍光色第一顏貌充滿淨  
好無比願令一切皆蒙此度於時世尊告四部衆汝  
等寧見淨復淨王一心叉手而住佛前皆曰以見佛  
言比丘是王於今是我學世現比丘像於將來世當  
得作佛名曰種帝王如來至真等正覺明行成爲善  
逝世間解無上士道法御天人師爲佛世尊其佛土  
曰廣普劫曰超王於時其佛諸菩薩衆不可稱限諸  
聲聞衆亦無央數其佛世界平等如掌無有傾邪無  
砂礫石得作佛時威神巍巍廣大無極光光如是能  
仁如來告族姓子欲知爾時淨復淨王發道意者豈  
是異人莫造此觀所以者何則是今現蓮華首菩薩  
是欲知爾時離垢王后者今光照嚴飾菩薩是常念  
諸菩薩愍傷衆生故生彼國開化度之欲知爾時二  
太子者則今藥王菩薩超藥菩薩身是又族姓子藥  
王菩薩超藥菩薩功德巍巍無限若斯在無央數億  
百千垓諸如來所植衆德本是二正士道德備悉不  
可思議若有聞此二正士名執持懷抱一切衆人皆  
當禮敬如是學士天上世間皆歸仰之佛說是往古  
宿世本所行時八萬四千人遠塵離垢諸法法眼淨  
樂普賢品第二十七

於時普賢菩薩過東方恒河沙諸佛國土諸菩薩來者動諸佛國雨衆蓮華鼓億百千妓妓樂歌歎如來功勲承其開士其大神足無極變化大菩薩身威神巍巍聖旨玄妙普照十方與諸天龍捷陀羅阿須倫迦留羅真陀羅摩休勒人及非人俱各各將諸眷屬各顯神足不可思議至靈鷲山往詣佛所稽首足下繞佛七匝前白佛言我從寶超威王如來佛土來承今世尊演正法華經故至忍界欲得聽受與諸菩薩無數百千亦樂聽聞所宣道議善哉世尊唯加垂哀以時班宣正法華經寧有女人何所修行得奉執經卷時佛卽告普賢菩薩族姓子女人有四事法得是經卷何謂爲四一曰常爲諸佛所見建護二曰積功累德不以懈廢三曰能分別化究暢衆要諸所聚處四曰普護衆生發未發者是爲四逮是經卷時普賢菩薩前白佛言最後末俗五濁之世若有比丘受是經典長擁護之令得吉祥除衆枉橫毒亦不行令無伺求得其便者有受是經咸共宿衛令魔波旬不能燒亂及諸官屬諸鬼神龍溝邊溷鬼蠱道符祝令不得行躬身自往常以一心擁護法師當使安隱若有比丘學此經典坐起經行精進修業上馬車乘往到

其所護此經典與諸菩薩眷屬圍繞俱當往詣法師  
比丘受是經者思惟行者令不忘失正法華經一句  
之義乘駕往詣此學士所目自奉見爲是經故見我  
歡喜普更勤學當護法師逮得三昧若復獲致回轉  
總持又當逮成若干百千億周旋總持曉了一切諸  
音總持唯願世尊若於最後餘殘末俗五濁之世餘  
五十歲中比丘比丘尼清信士清信女受是經典宣  
示同學持書慕求爲他人說最後末俗餘五十歲若  
能受是正法華經心存解義精進不廢致二十日  
諸行稍備已致諸行二十日勤心存於法自現可  
敬巍巍之德乘六通馳與諸眷屬大小相隨往詣法  
師勸助法師二十一日專修此法使心開解懷致總  
持若使法師不化衆生若不勸助不能開化非人得  
便猶是法師不得擁護不致安隱是故學者常行精  
進承佛威神宿衛法師若有法師持佛正法便勤精  
進願聽總持其辭祝曰

無我除我回我方便實仁和除甚柔軟柔弱句見諸  
佛因諸總持行衆諸說蓋回轉盡集會除衆趣無央  
數計諸句三世數等越有爲學諸法曉衆生音師子  
娛樂

唯然世尊是則名曰是總持句若有菩薩耳根聽聞此總持句入耳中者卽當知之普賢菩薩之所建立是正法華經若布施天下閻浮利內值是經者心當思念普賢菩薩威神所致令我等輩致是經卷普賢菩薩所行神化令此衆人致此妙典斯等衆生無數佛所積衆德本如來至真手摩其頭若有書寫執持在手則奉佛身敬愛道法敬書是經書是經已欲解中義於此壽終生忉利天適生天上八萬四千天人玉女往就供養鼓琴歌頌已作天子坐玉女中而相娛樂若族姓子但書是經功德如是何況誦說思惟中義是故世尊一心勤修正法華經書持經卷常當思惟一切不忘當禮此人用書是經至德所致而爲千佛所見授臂臨壽終時面見千佛遊在吉安不墮惡趣壽終之後生兜術天適生天上八萬四千諸玉女衆往詣其所鼓諸妓樂而歌頌德在諸玉女以法相樂是族姓子書是經者功德如斯何況誦說思惟其義是故勤修書寫宣傳正法華經思惟奉行皆令具足專精一心志未曾亂千佛授臂臨壽終時面見千佛不墮惡趣於是壽終生兜術天在彌勒佛所成菩薩身三十二相莊嚴其體億千玉女眷屬圍繞是

故智者常當勤修書是經典敷演思惟唯然世尊若有書此經卷思惟誦說功祚無量不可稱限巍巍如是是故智者書持是經當得逮致若干功德吾以是故建立是經用吾弘意勤念道法流布天下聞浮利內於是能仁如來至真告普賢曰善哉善哉汝乃發心多所哀念精進勤護將來菩薩勸導於斯無思義法其心懷抱無極大哀發心之頃攝無量行各執經卷建立擁護若有受持普賢菩薩宣其名者則當知之見能仁佛前已曾聞如是法像供養奉事見能仁佛班宣經道讚之善哉如來摩頭則當謂之是普賢也佛之威神之所建立佛以衣服而覆護之受如來教不樂俗業不喜調戲合偶嘲譏不好歌舞不遊在外不入屠殺養猪雞鴉不與女人無益從事若聞是經書寫聽受持諷誦說樂如是像自然之法思惟奉行緣內精專自興福力一切衆生若有覩見靡不受敬若有比丘受持此經不爲姪怒癡所縛不爲貪嫉自大所繫不懷憍慢剛強自用強梁邪見已利止足若有法師普修至賢最後末世餘五十歲五濁之俗必有比丘受持是經當作是智思惟解念是等族姓必至道場降伏魔宮而轉法輪擊於法鼓吹大法螺

演時法雨於師子座而處法坐最後末世受持是經  
功德如是又是比丘不倚利養不貪衣鉢是等法師  
志性質直而無諛詭不墮癡冥其人現在自然如是  
若有比丘受持是經世世不忘所生聰明黠慧未曾  
聾盲現在獲安無有衆患若毀此經訶學持者而復  
誹謗其人現在身致癩病見書是經非之不可而共  
調戲所生之處其身缺陋爲火所燒常遇諍訟鼻面  
生炮手足繚戾口目不正其身臭穢體生瘡痍醫藥  
不治困苦難言若說是經有聞見者宣之不可憎惡  
不喜所說不誠言不真實用是犯惡衆罪之故得殃  
不量在所不安佛言是故普賢若見比丘受持是經  
遙起遠迎恭敬承事如奉如來今佛現在靡不歸命  
歸彼法師如是無異乃應佛教佛說是樂普賢品時  
如恒河沙億百千垓諸菩薩衆皆逮總持

囑累品第二十八

於是世尊能仁從法座起令諸菩薩如其色像示現  
神足都舉大會著其右掌而讚歎曰諸族姓子佛從  
無數不可計會億百千劫積累造行乃成無上正真  
之道得度無極故取諸賢安錯右掌舉手下之以爲  
念識當受斯經持諷誦讀當爲衆會分別說之令諸

羣生普得見聞又族姓子心無所著勿得祕惜此正法華經志無所畏則施佛慧如來之慧自在之慧則爲無上無極法施富學佛行無得矜惜慳嫉愛重宣廣示現斯如來慧當使偏聞至所不至往所不往當勤聽受此要經典其不信者當令信樂當勸羣生入于尊法諸族姓子能如是者則知如來之所建立時諸菩薩爲能仁世尊所見咨嗟悉踊躍加敬傾身側體低頭又手稽首歸命向能仁佛同聲啓白唯如世尊所勅不敢違教請奉行之具足順從如佛所宣願勿爲慮諸菩薩三啓如是所至到處周旋十方班宣

聖旨爾時能仁正覺一切發遣十方世界諸來世尊各隨宜便從其所安時十方佛皆亦報曰如來亦當從宜所安諸如來正覺多寶世尊七寶講堂佛之塔廟卽復故處又諸如來皆從所安

佛說是經時十方無量異佛世界諸來大聖坐佛樹下處師子座多寶如來及大士等諸餘學行現佛前者不可計會無數無量并從地中涌出菩薩諸大聲聞四部之衆諸天龍神阿須倫捷沓和世間人民聞佛所說莫不歡喜

## 正法華經卷第十

音釋

饗餐

饗

土刀切貪財也

耗呼到切減也

駛踈士切疾也

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

狃

八四十七 終